



南宋文範

和 16
341
3



南宋文範卷八目錄

七言古詩

假山

松棚

題舍弟舒嘯亭

阻風雨辟邪渡寄王仲成

載酒堂

黎道人自長沙入閩解近見之論易頗有所得自言居醴陵

山中有田廬養魚種竹可以卒歲作取足庵養方堂優游

其間藏書教子甚樂也遽還求詩贈之

贈別竹西王彥升居士

送趙承之出守鄧州

次韻酬彥達

靈隱宮

楊時

洪芻

張守

汪藻

李光

自言居醴陵

養方堂優游


李彌遜

李彌遜

張綱

張綱

李綱



利
294
3



南宋文範卷八目錄

錢東之教授惠澤州呂道人硯為賦長句

陳與義

遊南嶂同孫信道

陳與義

遙碧軒作呈使君少隱時欲赴召

陳與義

次韻何子楚食櫻桃

沈與求

十里巖石壁

沈與求

題宣和御畫

王庭珪

送宣向卿往衡山兼寄胡康侯侍講

王庭珪

觀徐明叔畫湘西磨崖圖

王庭珪

送王祕閣二首

韓駒

高風堂

朱翌

夏致宏方城道中以詩見寄避地窮山秋雨仍作因次其韻

張嶠

夜起觀雪

劉一止

和秀實寄詩

王洋

戲贈張仲嘉司兵

程俱

圃景大吟呈伯氏

胡宏

黃楊巖

鄧肅

發翠微寺

呂本中

墨梅

呂本中

浯溪

呂本中

寄蔡伯世李良字

呂本中

明皇九馬圖

劉子翬

兼道攜古墨來墨面龍紋墨背識云保太九年奉勅造長春

殿供御龍印香煤旁又識云墨務官臣庭邽監官臣夷中

臣子和臣卞等進蓋江南李氏物也感之為作此詩

劉子翬

贈周宗寅

劉子翬

吳傅朋出遊絲書求詩

曾幾

黃嗣深尚書自臨川省其兄嗣文戶部于宜春用元明魯直唱題李生墨竹梅

曾幾

遊灤峰

徐俯

次韻鄧志宏送張思道遊福唐

陳淵

同伯通端杲姪效盧全體

范浚

早春偶題

林之奇

次韻伯尹食糟民示趙鵬翔

周紫芝

僕久客錢唐有吹笛月下者同旅聞之淒然皆有思屬令賦之

李遠

題祝生畫

朱熹

讀通鑑紀事本末用武夷唱和元韻寄機仲

朱熹

奉陪機仲宗正景仁太史期會武夷作

朱熹

和李伯玉用東坡韻賦梅花

朱熹

次張彥輔賞梅韻

朱熹

進讀三朝寶訓終篇賜宴錫賚謝恩詩

題蔡濟所摹御府米帖

送通守趙積中朝議請祠歸天台

湘口夜泊南去零陵十里矣營水來自營道過零陵下湘水

自桂林之海陽至此與營會合為一江

歲旱邑人禱第五羅漢得雨樂先生有詩次韻

胡宗偉罷官改秩舉將不及格往謁金陵丹陽諸使者遂朝

行在頗有倦遊之歎作詩送之

送詹道子教授奉祠養親

浮邱亭

題唐德明建一齋

上元夜里俗粉米為繭絲書吉語置其中以占一歲之福禍

謂之繭卜因戲作長句

周必大 張孝祥 范成大 范成大 范成大 范成大 范成大 楊萬里

和昌英叔雪中春酌

楊萬里

瓶中梅花長句

楊萬里

太平寺水

楊萬里

寄題李與賢似剡菴

楊萬里

謝木韞之舍人分送講筵賜茶

楊萬里

題南海東廟

楊萬里

遊蒲澗呈周帥蔡漕張舶

楊萬里

過秀溪長句

楊萬里

題興甯縣東文嶺瀑泉在夜明場驛之東

楊萬里

題曹仲本出示譙國公迎請太后圖自肅天仗以下皆紀畫

楊萬里

也

楊萬里

會稽秦頌德碑

王十朋

王孝子傳詩

王十朋

吳子既結茅竹洲以娛親復於居之前沼為亭以朝爽名之

蓋亭西面於晨興看山為宜

吳儆

陸務觀寄著色山水屏

韓元吉

歸耕堂

韓元吉

送朱元晦

韓元吉

送許侍郎知宣州

韓元吉

方務德元夕不張燈留飲賞梅務觀索賦古風

韓元吉

上巳臨川道中

陸游

夜聞松聲有感

陸游

得韓无咎書寄使金時宴東都驛中所作小闕

陸游

龍眠畫馬

陸游

錦亭

陸游

五月十一日夜且半夢從大駕親征盡復漢唐故地見城邑

陸游

人物繁華云西涼府也喜甚馬上作長句未終篇而覺乃足成之

漁翁

陸游

贈劉改之秀才

陸游

題少陵畫像

陸游

對酒

陸游

苦筍

陸游

僧廬

陸游

綿州錄參軍廳觀姜楚公畫鷹少陵為作詩者

陸游

題十八學士圖

陸游

蒸暑思梁州述懷

陸游

題明皇幸蜀圖

陸游

龍洞

陸游

冬夜聞雁有感

陸游

夜夢與數客觀畫有八幅龍湫圖特奇客請予作詩其上書數十字而覺不復能記明且乃追補之亦髣髴夢中意也

送襄陽鄭師唐老

陸游

題尊信齋

陸游

南宋文範卷八

長洲顧少卿先生鑒定

秀水莊仲方編

七言古詩

假山

楊時

衡湘側南二千里清淑之氣常蜿蟺丹砂玉石氣所感融結萬狀
 非磨鐫窮源荒蹊異岱賦不圖禹績輕棄捐苔封土蝕誰復問嶙
 峴僵卧當市廛龜山老叟見之喜鳩徒輦置羅前軒岩巖孤峯露
 仙掌如掌屹若太華青摩天傾崖斷壑坐中見蔥蒨似玉生雲
 煙初疑祖龍未死日浮梁擬跨成池淵神號鬼怒驅不前捶擊剗
 磷成枿圈又疑巨人出龍伯揭竿來自崑崙巔連鼇合負雲濤翻
 蓬壺簸蕩留平川繫予竟日倚欄檻矯首便欲追靈仙尻輪神馬
 自足駕已覺兩腋風冷然瓊臺浮游與世隔醉傲笑拊洪崖肩山
 間草木即靈餌含英茹實資長年悠悠廣息變今古坐看溟渤成
 桑田

松棚

洪芻

南山落落千尺松，千雲蔽日搖青葱。盤根錯節歲月古，龍吟虎嘯號悲風。北山文杏中梁棟，我材臃腫非世用。修枝細葉幸有餘，賴肩大束那辭送。承以高竹青扶疏，置君寬間之玉除。倏如亂雲駐車蓋，恍似廣庭張拂廬。垂頭塌翼下孔翠，張鱗擺鬣來鯨魚。穿空入隙清飈吹，疑有萬壑哀聲隨。羲和按轡不馳騁，炎官火傘將安施。揭來投荒近循海，日坐板屋如蒸炊。南山蒼官憐我熱，遺我七鬢千孫枝。但令修幹青青多，溫風烈日如予何。

題舍弟舒嘯亭

張守

不羨高門聯甲乙，欲傍林泉老蓬華。田間築室路三义，亭子蔭茅簷四出。春霖竹牖上，蝸牛夏夜藜牀吟。蟋蟀茅亭雖小容，舒嘯邱壑胸中故。超軼晨牖晚徑足，披風細柳修篁長。障日閉關已作柴桑趣，況有腴田供種秫。客來共醉甕頭春，長嘯一聲百憂失。遙想妖氛纏象魏，忍見風塵侵警蹕。勿學蘇門真避世，要似武侯時抱

膝我紆郡紱，病且衰欲報君恩。老無術簪裳未覺，柴柵殊鼓吹。殆與池蛙一簿領，幾回迷老眼。況復伸眉縱狂率，已慙成瑁功。曹諺空憶劉琨胡騎逸，遐想東臯落成處。欲往從之足，雙桎夢君琢。句俯清流春草池，塘到詩律便應投。紱賦歸來肯待子，年婚嫁畢

阻風雨辟邪渡寄王仲成

汪藻

渡頭急雨鳴森木，木杪顛風飛大屋。沒腰寒水稻生芽，滿眼青泥車折軸。山行值雨舟值風，窮愁日日煩天公。不如歸卧澗壑底，世事不掃春煙空。別君兩年從此別，喜君胸次渾冰雪。擬將身作賈胡留，無柰事如空鳥滅。挽我不回君怒嗔，交情把玩轉清新。相隨百里還相見，只有西山似故人。

載酒堂

李光

東坡文章喧宇宙，燦如日星垂不朽。六一老人猶避路，作者紛紛皆束手。手歐公見東坡文歎曰老夫俊逸精神追李杜，華妙雄豪配韓柳。晚年流落海南村，黎唱蠻謳隨蜚叟。先生已去五十年，遺墨

殘篇尚多有豐城寶劍埋獄中光燄猶能射牛斗敗垣壞壁祕蝸

涎天矯龍蛇已驚走東坡真跡多為有力者獨餘黎氏舊園亭喬

木森森免薪薪半是東坡親手植老榦膠枝互纏糾杖藜乘興訪

遺像遐想英風佇立久曾吹葱葉送迎翁當日兒童今白首子雲

今六十餘矣東坡所謂小童即此人也莫嗟寂寂路荒蕪亦有幽人時載酒

黎道人自長沙入閩解逅見之論易頗有所得自言居醴陵

山中有田廬養魚種竹可以卒歲作取足庵義方堂優游

其間藏書教子甚樂也遽還求詩贈之 李彌遜

兩腳不踏咸陽塵兩眼不逐瀟湘春胸中乾坤照萬古奇耦縱橫

何足數閉門有竹食有魚遺子有田家有書一生可了心自足世

上紛紛謾榮辱

贈別竹西王彥升居士

李彌遜

參軍四壁生秋草髣毛不似心已老終隨煙霞學巢由一室安能

事除掃竹西舊說青雲客詩思長留意無極塵埃不見襄陽山賴

有斯人吐消息赤心照日青眼明與君一見輸生平君去摩天學
孤鳳我今飲海盤長鯨雲車乾兮風馬休呼兒乞取千金裘明朝
有句道不得黃葉滿庭無限秋

送趙承之出守鄧州

張綱

蓬萊宮中老仙伯一首詩堪萬人敵胡不佩劍趨明光要試南陽

二千石南鄉異時名帝鄉龔山菊水秋風香民歌召杜向千載至

今遺俗皆農桑使君此去殊不惡坐嘯風流有餘樂堂前晝燭照

紅妝席上枯棊響飛雹行看璽書下赤墀旌旗夾道生光輝應念

斯文要羽翼歸來九萬翔天池

次韻酬彥達

張綱

浮榮過眼風脫葉鴛行無復清夢接柴門晝閉雀可羅寒日暉暉

弄疏樾已種芳蘭滋九畹更遣胎仙舞三疊李侯壯志亦可人舉

目萬里欲橫絕醉眼時看石稜紫吟髯半作霜棘折方今聖主躬

儉勤奏賦不須跨羽獵中興盛事要磨崖老於文字誰踰結願君

勉力上扶搖渺渺雲海出飛楫莫隨鍛翮卧窮巷漫學啼螿弔寒月

靈隱宮

李綱

我昔曾遊飛來峯白猿晝掛峯上松晧然靈光如彩虹鐘磬自響金仙宮宦遊漂泊西復東雖欲再到無由從帝居鈞天陋瀛蓬螭坳載筆侍重腫逆鱗聊試摩神龍謫墮劔浦山重重征鞍來此尋舊踪恍如夢落煙霞中寒泉幽石欣相逢門前池館虛舍風一洗塵慮清心胸明朝南去隨征鴻惆悵勝遊回首空

錢東之教授惠澤州呂道人硯為賦長句

陳與義

君不見銅雀臺邊多事土走上觚稜蔭歌舞餘香分盡垢不除卻寄書林汗縑楮豈如此瓦凝青膏冷面不識奸雄曹呂翁已去泣餘泣通譜未許弘農陶暮年得君真耐久摩挲玉質雲生手未知南越石虛中亦有文章似君否西家撲滿本弟昆趣清尙濁何年分一朝墮地真瓦礫莫望韓公無瘞文

遊南嶂同孫信道

陳與義

遙瞻南嶂深復深雙崖與天藏太陰青鞋濟勝不能懶踏破積雪窮崎岑空中朽樹抱孤篠無竅蒼壁生橫林孤禽三叫危石裂欲返未返神蕭森磴迴忽然何處所當面煙如翠蛟舞石門泄風無晝夜古木截道藏雷雨丹邱赤城去幾許下視人間足塵土放身天地不自知導以龍蛇翼熊虎山中異事記今晨杖藜得道孫與陳

遙碧軒作呈使君少隱時欲赴召

陳與義

我本山中人一喚起趨埃塵君為邊城守作意邀山入牕牖朝來爽氣如有期送我憑軒一盃酒丈夫已忍猿鶴羞欲去且復斯須留西峯木脫萬鬢擁東嶺煙破修眉浮主人愛客山更好醉裏一笑驚蠻州丁甯雲雨莫作厄明日青山當逐客

次韻何子楚食櫻桃

沈與求

輕衫駿馬飛彈丸上林花開粉繡團御厨賜笋未解籜山櫻亦復

登金盤櫻筍厨事見秦中歲時記宋廟薦新勤玉路凡果紛紛不論數風清日
美雨絲收朱實烘春燃綠樹筠籠採擷價萬錢北人羊酪雅所便
自從燕罷曲江曲故事進士賜櫻桃燕五湖十載身回旋已作孤蓬任流轉
萬顆徒勞野人獻故無清夢大明宮醉倚顏酖浮玉盃

十里巖石壁

沈與求

巨靈手擘青瑤璞平削無痕看斧鑿六丁取將天路遙雷電收威
半空落至今翠嶺橫道旁絕壁萬仞青茫茫倚天屹立不可近下
視培塿如羣羊薜花爛斑風雨漬藤梢天矯蛟龍戲中開微竇走
鳴泉白虹吞吐回雲氣流泉萬古潭水深山寒無風鬱沈沈下田
納納禾稼茂發源灌溉初何心峭直誰令據當路松柏蕭森半煙
霧猶恐夜深魑魅驚更遣山靈謹呵護

題宣和御畫

王庭珪

玉鎖宮扉三十六誰識連昌滿宮竹內苑寒梅欲放春龍池水暖
鴛鴦浴宣和殿內新雨晴兩鵲飛來向東鳴當時妙手貌不成君

王筆下春風生長安老人眼曾見萬歲山頭翠華轉恨臣不及宣
政初痛哭天涯觀畫圖

送宣向卿往衡山兼寄胡康侯侍講

朱陵衡岳仙人所居公是行緣故交招隱公有

海內甲馬未盡休豪英為時當出謀天生奇才必有用何乃相率
居巖幽胡公人品今第一汗漫久作朱陵遊朱陵窟宅倚蒼翠此
公招隱安可留九廟今誰起頽壓四方正爾煩誅求我聞昔時元
刺史春陵地分天子憂少陵作詩頌其事至今人傳元道州公為
道州績猶偉誰為再作春陵謳孤城疲卒捍狂賊高論力詆庸兒
羞安得如公數十輩參錯天下為邦侯京洛腥羶不難掃潢池寇
孽不難收願公早請尚方劍先斬佞臣張禹頭

觀徐明叔畫湘西磨崖圖

王庭珪

衡山高出北斗邊九疑蒼梧相屬聯羣峯環走如卻立山腳插入
瀟湘川朱陵渺邈迷處所白鶴噴薄飛流泉坐看徐郎拂絹素盡

驅山岳置眼前徐郎豈是真畫手酒酣遊戲乃其天巴陵洞庭連浦激鯨鯢蟠穴爲賊淵詔謂將軍出旗鼓樓船蹴踏驚浪喧櫓槍夜落照湖水雕弓十萬猶控弦湘西古寺最奇絕丹崖翠壁開何年況公文章善敘事大字怪偉宜鑱鐫中書異時觀落筆因煩吮墨圖凌煙孟公韓公毫髮動腰鞞大羽冠進賢他年中興事可考公名亦與茲山傳

送王祕閣二首

韓駒

烏衣諸王吾早聞晚塗獨識和州孫風流踏拖欲垂盡文采陸離今尚存奉祠乃是衰翁事如君胡爲亦爲此僕夫在門君疾驅往獻天子平邊書右軍池頭鶴鵠呼康樂臺下移檉疏碧山學士此築室白髮散人來卜居身隨沙鷗卧煙雨十年無書上公府枉作西班牙老從臣看君才華不能舉

高風堂

朱翌

一溪之雲各爲雨聊與蕭王分出處亂山深處有生涯三尺漁竿一枝艣細讀懷仁輔義書先生於世未嘗疏我已飄然遺物去斯言卻以告司徒參政樹碑頌遺德舍人作堂詔無極高風之高高幾何下視烏龍六千尺

夏致宏方城道中以詩見寄避地窮山秋雨仍作因次其韻

張嶠

柴門直面排青壁山木凋霜疏寂歷西風吹雨眾山昏聲落茅簷斷還滴每讀離騷傷遠遊一爲遷客又經秋四時代謝不停軌澗江萬古長悠悠丹楓黃葉照巖壑物態故欲增繁憂詩成滿袖濕煙起寸心折盡空搔頭

夜起觀雪

劉一止

寒空夜作山林聲打牕窸窣飢鼠行褰帷忽怪窗澹白開門雪飛縱復橫天上瑞花開又落庭下疏梅初破萼忍寒耐苦發孤妍似與老人甘落莫遙憐國難何時清嗣皇求衣天未明長蛇封豕欲

薦食執筆固陋慙書生皇天悔禍今可卜乞與江湖比歲熟莫言
此雪不樂飢便是天公真雨粟

和秀實寄詩

王洋

去年河南歸故地今年朔方兵又起血性面埋曾幾時無乃奸盟
神不喜嗟爾遠人來要荒定無戰士傷金瘡封疆萬里尚越境金
帛露積猶多藏國家彌文今尚武已碎銅山鑄銅虎勿矜突騎飲
長河肅慎燕陲吾北土且知成功俱自天天心可卜因豐年但令
三錢博斗米任爾自枕干戈眠

戲贈張仲嘉司兵

程俱

君不見謝公棲遲樂東土起作司馬征西府莫年談笑有穰孫鶴
唳風聲走強虜又不見子猷剡州高興闌肯隨鶴書落人間不知
騎曹底官職朝來拄頰看西山平生清眞翠嶺老泉石膏肅偶同
調歲寒落落見孤松不忍低眉竄枯槁年來無米繼朝炊聞說吳
興富魚稻不妨來作古司兵士卒投醪止鳧藻美哉洋洋雪溪水

秋塘百里荷花繞當年釣徒放浪處醉目悠然送歸鳥斯人不死
世不識往往凌波弄瑤草君方參同調龍虎我欲治荒種梨棗會
當夜月見龐眉一笑超然凌八表

圃景大吟呈伯氏

胡宏

青鞋黃帽侵晨起杖策徐行聽流水雲輕淡月欲明時竹裏清風
開太始山鐘間發催天曙廟鼓連聲動羣耳東山青樹映霞明西
嶺朱樓眇煙裏樵夫荷樵晨出山漁子攜魚午趨市靜看岐路人
營營獨坐小亭秋靡靡已知物理時常改因見天工神不死胸中
浩蕩一乾坤世上榮枯均泰否悠悠種植得佳趣春意生生自無
已

黃楊巖

鄧肅

石壁巉巖驚鬼劃異草幽花鎖春色羣山迤邐不能高突兀獨磨
霄漢碧芒鞋千尺上崔嵬手摘星辰腳底雷撥破煙雲得洞戶醉
眼恐是天門開入門嵯峨森紫玉冷風吹面天香馥箕踞胡不揮

塵尾萬指未充空洞腹我因避地訪名山扁舟夜渡沙溪寒辛勤
博此一笑喜太平猶在水雲間猛將今無三角虎狐狸晝號鯁鱗
舞靈巖知有老龍藏挽出人間作霖雨

發翠微寺

呂本中

古殿突兀風有聲粥魚欲打雞三鳴披衣起坐問行李僕人屢報
天陰晴昨日路長頻雨阻今日東風得無苦杉松連山寒欲動橘
柚隔籬香半吐卻憶京城無事時人家打酒夜深歸醉裏不知妻
子罵醒後肯顧兒啼飢如今流落長江上所至盜賊猶旌旗已憐
異縣風俗僻況復中原消息稀

墨梅

呂本中

嶺南十月春漸回妍暖先到前村梅問君何處識此妙一枝冷艷
隨霜開長江凜凜欲奔岸乃得好事移墻隈初疑滲漉入瘴霧更
欲寂寞埋煙煤微風不動暗香遠淡月入戶空徘徊坐看粉黛化
羶惡豈但桃李乘輿臺我行萬里厭窮獨疾病未已心先灰到此

不覺三歎息恐是轉側同南來異鄉久處少意緒破壁相對無根
荻古來寒士每如此一世埋沒如蒿萊遁光藏德老不耀肯與世
俗相追陪輪囷離奇一作濶多見用犧尊青黃木一作木為一作木災含毫吮
墨去顏色一作濶自不必須穿栽歲窮路遠莫惆悵此去保無蜂蝶猜

浯溪

呂本中

五月行人汗如雨意緒昏昏雜塵土浯溪一見中興碑便有清風
濯煩暑中興之業誠艱難敢作漢武周宣看紛然大歷上元間文
恬武嬉主則辱但知追咎一祿山袖手不作如旁觀天亦未使庸
夫干故生李郭在人間一時節士張許顏其誰不知唐已安道州
落筆風雨寒魯公大書鎮百蠻訶叱水怪摧神姦有臣若此世所
歎而不能使君心還我來轉嶺逾千盤對此凜然清肺肝想見羣
小遭譏彈爾曹何心猶誕謾至今怒髮常衝冠

寄蔡伯世李良宇

呂本中

兩君羈旅宦西蜀我亦江南住僧屋想像平生肺腑親晴天何處

飛黃鵠庾郎故是豐年玉道兒更是見不足藜羹脫粟有餘味富
貴薰天果非福死生契闊今誰在往事悠悠陵谷改他年乘興下
瞿塘見我衰頹莫驚怪別尋好語和君詩償盡平生難韻債掃除
壁土更焚香下酒如今有鮭菜

明皇九馬圖

劉子翬

書生兀兀園不窺見馬豈辨騮與騅開圖九駿立突兀摸捺知是
真龍兒奔雷蹴踏原野動曳練慘錯風沙隨華纓金絡豈不好矯
首奮迅那容羈吾聞取驥如擇士競愛妥貼驚權奇士懷倜儻眾
論斥馬有顛頽羣鴛欺六閑象養固恩厚橫氣摧折常鳴悲丹青
倘不逢妙手萬世豈識真龍姿因思中原政格鬪鐵騎倏忽銀山
移著鞭安得致此物掩畫四顧徒歎歎

兼道攜古墨來墨面龍紋墨背識云保太九年奉勅造長春
殿供御龍印香煤旁又識云墨務官臣庭邽監官臣夷中
臣子和臣卞等進蓋江南李氏物也感之爲作此詩

劉子翬

長春殿古生荆薈猶有前朝遺物在錦囊珍重出玄圭雙虬刻作
蜿蜒態枯皮剝裂幾弄剗斷缺精堅磨不殺吾聞李氏據江左文
采風流高一代當時好玩不獨此器用往往窮奢汰徵工選技填
御府不惜千金爲賞資治兵唐推英衛精治民漢許龔黃最惜哉
取士不知術妙手獨得庭邽輩真主馳驅八極中荒王逸樂孤城
內汗青得失更誰論尤物競爲人寶愛嗟余視此真龔土事有至
微猶足戒投文欲往弔江流幽魂未泯應慚悔

贈周宗寅

劉子翬

我車南君車北相逢總是天涯客擁爐談笑一燈殘出門風雨千
山隔

吳傅朋出遊絲書求詩

曾幾

使君官事閒時書略取萬象隨指呼空中遊絲定何物非蠶所吐
仍非蛛光春霽日青草暮惹草榮花細于縷君今幻出一毫端此

秘從來人未覩鈴齋觀者客如雲有無斷續吁難分不知誰束此
毛穎能使字畫纖無倫嘗聞掃聖生雪白顛草親承擔夫力世間
妙處不可傳心手應時須自得

黃嗣深尚書自臨川省其兄嗣文戶部于宜春用元明魯直

唱題李生墨竹梅

曾幾

紛紛畫手調紅綠好以桃花配叢竹豈無短紙作江梅雪裏溪邊
太幽獨李侯胸中有佳處研滴松煤聊寓目與梅擇對無可人分
付此君真不俗淡煙小雨空濛地何得月明疏影足始知璀璨出
斜枝詩畫古來真一族

遊潯峯

徐俯

昔年會稽探尚書探得六甲開山圖載之潯南天柱山上侵霄漢
下淵泉真人祕語世不傳但見絕頂蒙雲煙漢武射蛟浮九江舳
艫千里來樅陽築壇祈仙瞻杳茫茂林檜桂空青蒼石牛一卧叱
不起白鶴還歸深洞裏二月靈鶴有來時洞口桃花泛流水

次韻鄧志宏送張思道遊福唐

陳淵

紛紛沆耳俱宜洗坐遣高人厭邱里迅流早自促行舟更有西風
滿江葦當年筆陣掃千人今日流輩推能文英辭雄辯灑醉墨條
忽百變春空雲人間萬事秋毫細軒冕儻來誰著意身隨去櫂落
波間興逐冥鴻渺天際三山便到蓬萊宮卸帆海嶼窺魚龍夜涼
橫笛弄明月萬頃琉璃秋色中

同伯通端杲姪效盧全體

范浚

一春癡癖門長扃兩耳不聞鷓鴣聲不知東南風掃盡紅紫英行
行點檢桃李徑但見樹子青冥冥門前水流渠照灼須眉清科斗
遊其間腳股各已生渠旁草鬱鬱草地蚯蚓鳴韻如抽繭絲幽咽
得我聽念此瑣細物隨時變音形黃河赤鯉或點額老驥塞默長
羈纓嗟嗟世路真難行

早春偶題

林之奇

寒風淅瀝鳴枯葦小鴨睡殘猶未起更教細雨結輕寒坐聽蕭蕭

打牕紙石盆蒼蒲已抽翠雕斛栽花先生紫擁爐閉閣賦幽香未怕春冰生硯水

次韻伯尹食糟民示趙鵬翔

周紫芝

十年用兵九不熟人家有田不種穀盡枯膏血作軍儲卻買官糟貯飢腹富者鬻田貧鬻妻夜困桁楊曉敲撲長腰一粒不下咽輸入官倉常滿屋昔年貫朽內府錢諸公何苦開漢邊自從邊馬飲江水便恐黔首流飢涎黃塵白骨尙滿眼錦裘繡帽誰當前烹羊魚羔固不惡飢民食糟真可憐元侯幕下短主簿肯與斯民作調護不愁吏者拙催科寧脫青衫賦歸去詹侯老文稱大手樂府詩高世無有安得狂歌徹聖明便叱風雷清九有卻驅羣賊作良農還吾昭陵舊丁口

僕久客錢唐有吹笛月下者同旅聞之淒然皆有思屬令賦

之

李遠

柯亭之椽不復得蕲州黃竹今尙存蒼崖翠壁產修幹千頃蕭索

煙雲昏羌人眼力發天巧長笛裁成鳳膺飽老龍餘響出空星欲噴炎天作秋曉西湖夜寂涼風生山頭一鉤新月明商聲悽悲羽聲壯行子忽忽難為情時無綠珠清音激皓齒野王臨風三弄亦已矣唯有愁端無古今舉刀不斷東流水深閨蘭燈照空牀笛聲不如離恨長曲終人散一惆悵回首江山非故鄉萬事浮雲過寥廓且醉杯中琥珀薄君不見玉管橫吹黃鶴樓江城五月梅花落

前賢小集拾遺

題祝生畫

朱熹

裴侯愛畫老成癖歲晚倦遊家四壁隨身只有萬疊山祕不示人私自惜俗人教看亦不識我獨摩挲三太息問君何處得此奇和璧隋珠未為敵答云衢州老祝翁曾次自有陰陽工峙山融川取世界咳雲吐雨呼雷風昨來邂逅衢城東定交斗酒歡無窮自然妙處容我識爲我掃此須臾中爾時聞名今識面回首十年齊掣電裴侯已死我已衰祇君雖老身猶健眼明骨輕鬚不變筆下江

山轉葱蒨爲君多織機中練更約無事重相見

讀通鑑紀事本末用武夷唱和元韻寄機仲 朱熹

先生諫疏莫與傳忠憤激烈號旻天卻憐廣文官舍令只與文字

相周旋上書乞得聊自屏清坐日對銅爐煙功名馳驚往莫悔鉛

槩職業今當專要將報答陛下聖矯首北闕還潛然屬辭比事有

深意憑愚護短驚羣仙空言未秉太史筆自幸已執留臺鞭以温公

臺領書局時韓魏公與書有執鞭之語果然敕遣六丁取香羅漆匣浮桐川陰疑有

戒竦皇鑒履霜堅冰之語陽剝欲盡生玄泉明年定對白虎殿

更論大學中庸篇頃在武夷宮講正心誠意

奉陪機仲宗正景仁太史期會武夷作 朱熹

此山名自西京傳丹臺紫府中天似聞雲鶴時降集應笑磨螻

空回旋我來適此秋景晏青楓葉赤搖寒煙九還九返不易得干

巖萬壑渠能專同遊幸有二三子天昇此段非徒然梁郎季子山

澤臚傅伯爰益瀛洲仙相逢相得要疆附卻恨馬腹勞長鞭黃花

未和白雪句畫舸且共清冷川回船罷酒三太息百歲誰復來通
泉盈虛有數豈終極爲君出此窮愁篇

和李伯玉用東坡韻賦梅花 朱熹

北風日日霾江村歸夢正爾勞營魂忽聞梅藥臘先破楚客不愛

蘭佩昏尋幽舊識此堂古曳杖偶集僧家園嵐陰春物未全到避

逅只有南枝温冷光自照眼色界雲艷未怯扶桑暎遙知雲臺溪

上路玉樹十里藏山門自憐塵羈不得去坐想佳處知難言但哦

君詩慰岑寂已似共倒花前樽

次張彥輔賞梅韻 朱熹

朔風萬里開雲屏清霜夜墜朝景晴南枝浩蕩正春色凍藥的皪

含空明花邊偶對青銅鏡橋項不堪冰雪映擁爐獨坐只悲吟振

策出遊舒遠興暗香何處時一飄行行復值最長條仰頭欲折渺

誰贈滿意相思那得邀極知異縣淹行李心賞未甘輕付畀石雄

賦罷不相聞秀野書來因舉似兩翁句法爭新奇畫出疏影沈寒

漪幽探自出塵境外勝槩未舉兒曹知祇今嚼藥攀條處他日重
來記前度風臺月觀悄無言玉笛冰灘索同賦嗟予衰懶倦遊迎
過眼紛紛無復情尙喜疏英窺冰白更憐落片點苔青興來亂插
飛蓬首擬向君家醉君酒酒酣耳熱莫狂歌布鼓雷門須縮手

進讀三朝寶訓終篇賜宴錫賚謝恩詩

周必大

藝祖提劍開八荒太宗混一垂衣裳眞皇破虜神武揚夷夏億寧
法度彰寶訓成書紀宏綱有典有則萬葉昌憶昔壬午神龍翔季
秋庚子辰集房肇開講席臨清廂赭袍玉斧光照廊台司夾侍書
案黃韓林進讀天容莊御臣簪筆近御牀親聞玉音義甚長君子
小人初何嘗非關時運弱與強祇繫人主所否臧當年記注此特
詳往來寒暑今一章牙篋謬執心旁皇終篇正直恩德洋洋道山肆
筵酌天漿宮花壓帽羅絲簧硯來復古翰墨光馬出帝閑眞驪驢
閩山正焙隨寶香君賜如天不可量歸美獨愧詞荒唐恭惟聖治
超百王夙夜基命不敢康文德旣修夷可攘俎豆永埽旄頭芒三

聖勳烈同焯煌萬年億載娛慈皇

題蔡濟所摹御府米帖

張孝祥

生前官職但執戟身後一字萬金直當時雷電下收拾世間不復
有遺逸整整十卷字尤濕光彩激射海爲立平生我亦有書癖對
此儻恍心若失口吐汗下屢太息十日把換不得食作賤天公拜
稽首乞我此老生時一雙手爲君痛飲百斛酒墨池如江筆如帚
一掃萬字不停肘

送通守趙積中朝議請祠歸天台

范成大

城頭千峯青繞屋城下灘流三百曲誰云逼仄復逼仄尙有高山
肯來辱紅梅花下兩芳春風惠和如主人搶攘塵土簿書裏見
此纜籍天球温厚祿故人車結轍掉頭獨泛清溪月不從世外得
超然世間誰肯如公決生平我亦一沙鷗葦白蘆黃今正秋送公
使我歸思動破煙衝雨憶扁舟明年想見東山起我亦煎茶石橋
水道逢笠蓑把漁竿卽是馬曹狂掾史

湘口夜泊南去零陵十里矣營水來自營道過零陵下湘水

自桂林之海陽至此與營會合為一江 范成大

我從清湘發源來直送湘流入營水故人亭前合江處暮夜牆竿
轟沙尾卻從湘口望湘南城郭山川恍難紀萬壑千巖詩不徧惟
有蒼苔痕屐齒三年瘴霧亦奇絕浮世登臨如此幾湖南山色夾
江來無復瑤簪插天起陂陀狼石蹲清漲淡蕩光風浮白芷騷人
魂散若為招傷心極目春千里我亦江南轉蓬客白鳥愁煙思故
壘遠遊雖好不如歸一聲鷓鴣花如洗

歲早邑人禱第五羅漢得雨樂先生有詩次韻

范成大

海山之湫龍所宮濺瀑下赴聲琤琮碧矐大士何許主愛此匹練
飛冥濛偶然宴坐百千劫神力悲願俱無窮向來火雲挾日走沙
煎日爛千山童陸渾風高煽熟屬涇州草肥間雨工萬口嗷嗷叫
此土爐燎未吐誠先通暮塵捲地羊角暗朝霞橫天魚尾紅商羊

摩霄鳶起舞居然一澗歌年豐人言佛陀入三昧斷取世界如旋
蓬指麾釋梵駿奔走沉爾風伯并雷公風騷老將亦贊喜筆陣獨
掃詩壇空嗟余嘯詠不釋手一曲何啻歌三終

胡宗偉罷官改秩舉將不及格往謁金陵丹陽諸使者遂朝
行在頗有倦遊之歎作詩送之 范成大

凍雲埋山天冥濛北風無情雪塞空道旁人稀鳥飛絕問君東遊
何忽忽君言薄宦淡無味免俗未能聊復爾我評茲事一鴻毛因
行且看佳山水陵陽樓閣壓高城煙屏百疊雙流橫樓雙溪閣姑
孰江亭更奇絕濃黛兩抹長眉青當塗蛾眉亭望東山形成龍復
成虎賞心亭雨代遺蹤供甲古謂金陵鍾大荒莽蒼江水黃兩溪風煙眇
吳楚賞心亭雨花臺所見卻浮一葦下長川浮玉低昂波聒天長蘆真州寺
也蘇門北門也姑蘇臨波照金碧太湖三萬六千頃上有垂虹跨
國蘇門北門也姑蘇臨波照金碧太湖三萬六千頃上有垂虹跨
南極亭吳江長橋三高我家越相尚神遊試從煙浪訪扁舟問訊白

鷓相記否謂言久客不勝愁軟紅三尺長安道九重城闕乾坤繞
西湖山寺浙江樓君昔曾遊今更好故人客館中天開非君誰上
黃金臺挽著天衢五雲上卻望江湖如夢迴萬境何如一邱壑幾
時定解冠裳縛幔亭山下桂叢深清社向來都寂寞幔亭清社皆
宗舊隱故事

送詹道子教授奉祠養親

范成大

新安學宮天下稀先生孝友真吾師斑衣悞作長裙曳二年思歸
今得歸賤詞上訴人叵挽璽書賜可羣公歎青山百匝不留人空
與諸生遮望眼白雲孤起越南天向來恨身無羽翰下馬入門懷
橘拜身今卻在白雲邊鶴髮鬢鬢堂上坐兒孫稱觴婦供果世間
此樂幾人同看我風前孤淚墮一杯送舟下水西我欲贈言無好
詞徑須喚起東廣微為君重補南陔詩

浮邱亭

知郡秘書新作以望黃山有浮邱
容成峯浮邱公容成子所遊也

范成大

黟山鬱律神仙宅三十六峯雷雨隔碧城欄檻偃雙旌笑挹浮邱
為坐客巖扉無鎖畫長開紫雲明滅多樓臺雲中仙馭參差是肯

為使君乘輿來西崑嶠絕不可至東望蓬萊愁弱水誰知芳草徧
天涯玉京只在珠簾底他年麟閣上青空卻訪舊遊尋赤松我亦
從公負丹鼎來斲砂牀汲陽井朱砂峯溫泉皆在黃山黃山即黟山

題唐德明建一齋

楊萬里

城南前江後山址竹齋正對寒江啟不嫌漁火亂書燈只苦櫓聲
驚睡美平生刺頭鑽故紙晚知此事無多子從渠散漫汗牛書笑
憶江楓弄江水

上元夜里俗粉米為繭絲書吉語置其中以占一歲之福禍

謂之繭卜因戲作長句

楊萬里

去年上元客三衢衝雨看燈強作娛今年上元家裏住村落無燈
惟有雨隔溪叢祠稍簫鼓不知還有遊人否兒女炊玉作繭絲中
藏吉語默有所小兒祝身取官早小女只求蠶事好先生平生笑
兒癡逢場亦復作兒嬉不願著腳金華殿不願增巢上林苑只哦
少陵七字詩但得長年飽喫飯心知繭卜未必然醉中得卜喜欲

癩

和昌英叔雪中春酌

楊萬里

南溪春寒強似冬南溪春水走玉虹雷公戲手行春雪詩人嘲詞
便飛屑只嫌春雪趁春雷春容正要渠栽培凍作土花銷作雨多
般點綴春庭戶酒杯如海醉即休醉中看雪忘卻愁如何呼酒不
痛飲可令詩肩受淒凜少時狂殺老更狂長恐此意墮渺茫醉鄉
有地分一席且與先生十分梨花注大白

瓶中梅花長句

楊萬里

幽人蚤作月滿階月隨幽人登船齋推門欲開猶未開猛香排門
撲我懷徑從鼻孔上濯頂拂拂吹盡髮底埃恍然墮我眾香國欲
問何祥無處覓冥搜一室一物無瓶裏一枝梅的皜平生為梅到
斷腸何曾知渠有許香夜來偶忘挂南牕貯此幽馥萬斛強卻憶
去年西湖上錦屏下瞰千青嶂谷深梅盛一萬株千頃雪波浮欲
漲是時雨後初開前日光烘花香作煙政如新火炷博山烝山沈

水和龍涎醉登絕頂撼疏影掇葉粲花照冰井蜀人來張同舍郎
喚作謫仙儂笑領如今茅屋卧山村更無載酒來叩門一尊孤斟
懶論文猶有梅花是故人

太平寺水

郡人徐友畫清濟黃河

楊萬里

太平古寺劫灰餘夕陽雅照一塔孤得得來看還不樂竹莖荒處
破殿虛偶逢老僧聽僧話道是壁間留古圖徐生絕筆今百年祖
師相傳妙天下壁如雪色一丈許徐生畫水纔盈堵橫看側看只
麼是分明是畫不是水中有清濟一線波橫貫萬里濁浪之黃河
雷奔電卷儘渠猛獨清元是不隨他波痕盡處忽掀怒攪動一河
秋色暮分明是水纔是畫老眼向來元自誤佛廬化作金梅樓銀
山雪堆風打頭是身飄然在中流奪得太一蓮葉舟僧言此畫難
再覓官歸江西卻相憶并州剪刀翦不得鵝溪疋絹官莫惜貌取
秋濤懸坐側

寄題李與賢似剡庵

楊萬里

四明狂客一茆屋，敕賜剡川纔一曲。安福詩人李與賢，大書似剡山扉前。我曾著脚句踐國，奉詔昭陵省松柏。是時八月欲半頭，鏡湖不是人間秋。稽山影落水精闕，荷花露滴波中月。季真茆屋荒蒼苔，古木哀猿啼禹穴。今君結屋阿那邊，正似剡川若箇言。我到剡川君未到，似和不似然不然。君不見與公舊章天台賦，元不曾識天台路。一俛仰間已再升，何用瘦藤與芒屨。

謝木韞之舍人分送講筵賜茶

楊萬里

吳綾縫囊染菊水，蠻砂塗印題進字。淳熙錫貢新水芽，天珍誤落黃茅地。故人鸞渚紫薇郎，金華講徹花草香。宣賜龍焙第一綱，殿上走趨明月璫。御前啜罷三危露，滿袖香煙懷璧去。歸來拈出兩蜿蜒，雷鳴晦冥驚破柱。北苑龍芽內樣新，銅圍銀範鑄瓊塵。九天寶月霏五雲，玉龍雙舞黃金鱗。老夫平生愛煮茗，十年燒穿折脚鼎。下山汲井得甘冷，上山摘芽得苦梗。何曾夢到龍遊窠，何曾夢吃龍芽茶。故人分送玉川子，春風來自玉皇家。鍛圭椎璧調冰水。

烹龍庖鳳搜肝髓，石花紫筍可衙官。赤印白泥牛走爾，故人氣味茶樣清。故人丰骨茶樣明，開緘不但似見面。叩之咳吐金石聲，麴生勸人墮巾幘。睡魔勸我拋書冊，老夫七椀病未能。一啜猶堪坐秋夕。

題南海東廟

楊萬里

羅浮山如萬石鍾，一股南走如渴龍。雷奔電激遮不住，直抵海濱無去處。低頭飲海吐絳霞，舉頭對著祝融家。珠宮玉室水晶殿，萬水一日朝再銜。青山四圍作城郭，海濤半浸青山脚。客來莫上浴日亭，亭上見海君始驚。青山缺處如玉玦，潮頭飛來打雙闕。晴天無雲濺碎雪，天下都無此奇絕。大海更在小海東，西廟不如東廟雄。南來若不到東廟，西京未覩建章宮。海神喜我著綺語，為我改容收霧雨。乾坤軒豁未能許，小試日光穿漏句。

遊蒲澗呈周帥蔡漕張舶

楊萬里

勝日從公蒲澗遊，萬壑聲滿千崖秋。一徑如蛇三百曲，繞盡山腰

到山腹穹巖千仞敲欲裂仰看飛泉瀉雲窟鏘成環珮奏成琴濺
作珠璣霏作雪步穿危磴攀蒼藤忽上穹巖頂上行人在半天泉
在井不敢下瞰惟聞聲只怪前驅深不見須臾卻向前山轉海風
吹袖萬丈長海水去人一弓遠老僧高卧晏未興先遣長松夾道
迎小參古殿黃面老不見舊日安期生景泰上方半堵壁城中望
之雪山白卻從景泰望城中曉日樓臺煥金碧君不見中流千金
博一壺不如避山飢時粥一盃金銀繫肘大如斗不如避山倦時
一杯酒安期飛昇今幾年祖龍不是不求仙至今年年七月二十
五傾城遊人來訪古

過秀溪長句

楊萬里

去年來此上巳日今年重來未寒食臨溪照影老自羞慚愧春光
尚相識秀溪何許好春容最是溪深樹密中清棠開盡卻成白桃
花欲落翻深紅

題興寧縣東文嶺瀑泉在夜明場驛之東

楊萬里

筍輿路轉崖敲傾只聞滿山泉水鳴卷書急開已半失眼不停注
耳細聽石如鐵色黑壁立鏡面平水從鏡面一飛下蘄笛織簾風
漪生石知水力倦半壁鍾作玉一泓水行到此欲小憩後水忽至
前水驚分清裂白兩派出跳珠躍雪雙龍爭不知落處深幾許但
聞井底碎玉聲安得好事者泉上作小亭釀泉爲酒不用麴春風
吹作蒲萄綠醉寫泉聲入枯木何處更尋響泉曲

題曹仲本出示譙國公迎請太后圖自肅天仗以下皆紀畫也

楊萬里

德壽宮前春晝長宮內花開宮外香太皇頤神玉霄上都人久不
瞻清光今晨忽見肅天仗翠華黃屋從天降一聲清蹕萬人看天
街冰銷樓雪殘北來又有一紅繖八鸞三緋金轂端輦中自是瑤
池母鳳鳥霞裳翦雲霧太皇望見天開顏萬國春風百花舞乃是
慈寧太母回鑿圖母子如初千古無翔雲邊雪旗腳濕御柳宮梅
寒影疏向來慈寧隔沙漠倩雁傳書雁難託迎還蜺馭彼何人魏

武子孫曹將軍將軍原是縫掖忽攘兩臂挽五石長揖驕虜如
小兒奉歸慈輦如折枝功蓋天下只戲劇笑隨赤松蠟雙屐飄然
南山之南北山之北君不見岳飛功成不抽身卻遣秦家丞相噴

會稽秦頌德碑

王十朋

碑爲丞相李斯篆世傳在秦望山莫知所在教授莫君好
奇嗜古搜訪尤力有言碑在何山者莫以語某何山見於
圖經在秦望東南疑其真秦望也某欣然欲往職有所拘
以告會稽梁尉慨然而行登山果見之碑石僅存字磨滅
已盡墨片紙而還作古風長韻具記始末因次其韻且記
吾三人好事之癖亦以示後人也

姬嬴遺跡存者稀世傳石鼓稽山碑石鼓揄揚得韓子文與二雅
爭驅馳秦碑誇大頌功德埋沒草莽無人知或言山頂石猶在上
有虎豹龍蛇螭神藏鬼護荆棘蔽崖懸磴絕登無岐廣文好奇探
禹穴梅仙好事尋僧支我贊其行要親覩勿受世俗流傳欺望秦
秦望兩嶄絕何山壁立東南涯豐碑屹植最高處不知磨滅從何
時剔苔掃墨了無有模糊片紙亦作奇濃雲靄黯將雨古木槎
枒蟠老枝歸來走筆出險語訶叱政斯同小兒詩成得得寫寄我
辭嚴意偉法退之我聞秦人滅六國酷若大磔臨海虞先王法爲
秦所負負秦況有秦有司五經灰飛儒濺血堯舜周孔何能爲上
蔡獵師妙小篆奴視俗體徒肥皮東封秦山南入越大書深刻光
陸離沙邱風腥人事變鬼飢族赤誰嗟咨漢興萬事一掃去惟有
篆刻餘刑儀磨厓欲作不朽計其如歷數不及期蚩尤五兵紂漆
器人物美惡寧相疵我雖過秦愛遺畫南山入望頻支頤不須嶧
陽訪棗刻不用遷史觀雄辭虛堂默坐對此紙閉目暗想君勿嗤
要知秦碑沒字本卻類周雅無辭詩

王孝子傳

王十朋

臣子大節孝與忠父母仇讐天下同賢哉會稽王孝子感慨有古
烈士風松楸一夕盜破冢親獲鼠輩聞之公有司守法貸其命孝

子銜恨無終窮誰謂書生胆如許貌若疴羸中甚武手斬凶人提
觸體請死伸冤詣公府君不見齊襄內行世所羞春秋賢之緣復
讎又不見子胥鞭屍報父怨太史爲之作佳傳君今枕戈志已伸
更須移孝爲忠臣他年當作傅介子誓斬樓蘭雪國恥

吳子旣結茅竹洲以娛親復於居之前沼爲亭以朝爽名之

蓋亭西面於晨興看山爲宜

吳傲

抱甕自灌園勝遊貴人門有口自酌酒勝與俗人言園中多蔓草
晨夕費鋤芟遇夜或風雨安得久盤旋村酒不常有亦多苦酸
而況醉中語繆誤人所嫌不如飽喫飯清風北牕眠多則無覺
夢境仍多端惟有古斷簡言行皆聖賢讀之未竟篇眈昏如夢間
讀竟亦何爲聚訟徒喧煩厭煩以靜勝又類枯木禪握苗不芸苗
亡羊兩茫然何如池上亭虛曠可看山山色日夕佳晨興夜氣還
宴坐日過午清陰猶未遷西山倦挂頰南山興悠然晚山雖好不
遮日誰能觸熱望長安

陸務觀寄著色山水屏

韓元吉

我居面山俯潺湲憑軒卧牖皆見山山光水影入懷袖秀色爽氣
非人寰故人憐我新結屋猶恐看山未能足丹青寫作何許圖不
礙閉門聊縱目千峯繚繞生白雲小舟蕩漾橫江濱樓臺高下出
蘭若杳渺似有鐘磬聞坐驚巖壑環四壁寥落高秋變春色方壺
瀛洲遠不隔武陵桃花定誰識君不見韋侯絕筆畫古松黑雨白
日催虬龍杜陵老翁三歎息況有山木洪濤風又不見玉堂眞仙
草詔罷靜愛春山郭熙畫文章信美身不閒清嶂白波眼中借我
今乘間身未衰杖藜獨步哦新詩出門見山人見畫佳興自喜來
無時卧龍山腰鏡湖尾知有高齋照清泚功名逼子未得休歸坐
玉堂應記此

歸耕堂

韓元吉

退之手板愧丞相淵明束帶羞督郵紛紛雀鼠待一飽豈若植杖
芸西疇劉郎大耳最叵信剛道田園不可求摩挲髀肉事鞍馬堅

卧百尺營高樓安知南陽扶耒手談笑爲君分九州我來龜溪二
三載此策未辦誠淹留喜君負郭有餘地百金賣劍歸換牛樹頭
布穀曉相應築室坐占林塘幽詩成使我佳興動叫角便作商聲
謳他年金甌得長滿區區肯顧監河侯

送朱元晦

韓元吉

前年恨君不肯來今年惜君不肯住朝廷多事四十年愚智由來
各干慮君來正值求言日三策直前真諫疏詆訶百事推聖學請
復國讐施一怒天高聽遠語不酬袖手翩然尋故步我知君是諫
諍才主上聰明得無誤一紙底用教鷓冠百戰應當啟戎輅江山
千里正風雪歲月崢嶸將暮有田可耕屋蓋頭君計未疏吾亦
去君歸爲謝武夷君白馬搖鞭定何處

送許侍郎知宣州

韓元吉

我公名滿東西川一持使節幾十年橋經萬里坂九折兒童學語
知公賢上皇詔下嗟見晚歸來荷囊趨甘泉平生所學欲盡試新

語僅奏囊中篇公獻所著書兩淮碎破賴整理百工蠱敝資鑿鏹
念公雖老猷自壯何謂宜去請益堅玉音三諭不可挽一麾且復
臨江壖宣城景物今更妍木瓜如瓠栗如拳敬亭山下躡遊履疊
嶂樓中呼酒船詩公已往詩句在公有妙語真齊肩卻招李白弔
杜牧搜攬風月酬雲煙中原未復敵未滅政成請公須著鞭吾君
有意詢黃髮廟堂之謀當萬全

方務德元夕不張燈留飲賞梅務觀索賦古風

韓元吉

昨日風雨今日晴綠水橋南春水生使君元夕罷高宴亭午邀客
花間行危亭直上花幾許水仙夾徑梅縱橫不須沈水薰畫戟簾
幕自有香風清門前紛紛烏鵲亂隱几坐愛寒江明憶昨淮南戎
馬動豈謂景物還新正遺民歸公十萬口鼙鼓日日嚴刀兵眼看
指麾盡摩撫閭里愁歎成歡聲酬功端合侍玉輦安得坐嘯江干
城景龍燈火公尙記者舊出語兒童驚我來兩月濫賓客況有別

駕能詩名相從一笑說萬事重費美酒勤杯觥東風搖蕩入煙柳
歌管錯雜催離情詔書徵拜那可後爲公前馬遙相迎

上巳臨川道中

陸游

二月六夜春水生陸子初有臨川行溪深橋斷不得渡城近卧聞
吹角聲三月三日天氣新臨川道中愁殺人織織女手桑葉綠漠
漠客舍桐花春平生怕路如怕虎幽居不省遊城府鶴軀瘦苦坐
長饑龜息無聲惟默數如今自憐還自笑斂版低心事年少儒冠
未恨終自誤刀筆最驚非素料五更敲枕一悽然夢裏扁舟水接
天紅蕖綠芰梅山下白塢朱樓禹廟邊

夜聞松聲有感

陸游

清晨放船落星石大風吹颿如箭激回頭已失廬山雲卻上吳城
觀落日夜深龍歸擘祠門入木數寸留爪痕明朝就視心尚慄腥
風卷地雷霆奔歸船買酒特自慰性命平生驚屢試固知神怒有
定時波紋蹙乍魚鱗細如今衰病卧林垞霜覆茆簷月滿庭松聲

驚破三更夢猶作當時風浪聽

得韓无咎書寄使金時宴東都驛中所作小闕

陸游

大梁二月杏花開錦衣公子乘傳來桐葉滿地埽不得金轡玲瓏
上源驛上源驛中搥畫鼓漢使作客胡作主舞女不記宣和粧廬
兒盡能女真語書來寄我宴時詩歸鬢知添幾縷絲有志未須深
感慨築城會據拂雲祠

唐中受降城在拂雲祠

龍眠畫馬

陸游

國家一從失西陲年年買馬西南夷瘴鄉所產非權奇邊頭歲入
幾番皮崔嵬瘦骨帶火印離立欲不禁風吹圉人太僕空列位龍
媒汗血來何時李公太平官京師立仗慣見渥洼姿斷縑歲久墨
色暗逸氣尙若不可羈賞奇好古自一癖感事憂國空餘悲嗚呼
安得毛骨若此三千疋銜枚夜度桑乾磧

錦亭

陸游

天公爲我齒頰計遣飲黃柑與丹荔又憐狂眼老更狂令看廣陵
芍藥蜀海棠周行萬里逐所樂天公於我元不薄貴人不出長安
城寶帶華纓眞汝縛樂哉今從石湖公大度不計龔丞龔夜宴新
亭海棠底紅雲倒吸玻璃鐘琵琶絃繁腰鼓急盤鳳舞衫香霧濕
春醪凸蓋燭光搖素月中天花影立遊人如雲環玉帳詩未落紙
先傳唱此邦句律方一新鳳閣舍人今有樣

五月十一日夜且半夢從大駕親征盡復漢唐故地見城邑
人物繁華云西涼府也喜甚馬上作長句未終篇而覺乃
足成之

陸游

天寶胡兵陷兩京北庭安西無漢營五百年間置不問聖主下詔
初親征熊羆百萬從鑾駕故地不勞傳檄下築城絕塞進新圖排
仗行宮宣大赦岡巒極目漢山川文書初用淳熙年駕前六軍錯
錦繡秋風鼓角聲滿天苜蓿峯前盡亭障平安火在交河上涼州
女兒滿高樓梳頭已學京都樣

漁翁

陸游

江頭漁家結茅廬青山當門畫不如江煙淡淡雨疏疏老翁破浪
行打魚恨渠生來不讀書江山如此一句無我亦衰遲慙筆力共
對江山三歎息

贈劉改之秀才

陸游

若居古荊州醉膽天宇小尙不拜龐公况肯依劉表胸中九淵蛟
龍蟠筆底六月冰雹寒有時大叫脫烏幘不怕酒盃如海寬放翁
七十病欲死相逢尙能刮眼看李廣不生楚漢間封侯萬戶宜其
難

題少陵畫像

陸游

長安落葉紛可掃九陌北風吹馬倒杜公四十不成名袖裏空餘
三賦草車聲馬聲喧客枕三百青銅市樓飲杯殘鸞冷正悲辛仗
內鬪雞催賜錦

對酒

陸游

閑愁如飛雪入酒卽消融好花如故人一笑盃自空流鶯有情亦念我柳邊盡日啼東風長安不到十四載酒徒往往成衰翁九環寶帶光照地不如留君雙頰紅

苦筍

陸游

藜藿盤中忽眼明駢頭脫襪白玉嬰極知耿介種性別苦節乃與生俱生我見魏徵殊媚嫵約束兒童勿多取人才自古要養成放使干霄戰風雨

僧廬

陸游

僧廬土木塗金碧四出徵求如羽檄富商豪吏多厚積宜其棄金如瓦礫貧民妻子半菽食一飢轉作溝中瘠賦斂鞭笞縣庭赤持以與僧亦不惜古者養民如養兒勸相農事憂其飢露臺百金止不爲尙愧七月周公詩流俗紛紛豈知此熟視創殘謂當爾傑屋大像無時止安得庇民免飢死

綿州錄參軍廳觀姜楚公畫鷹少陵爲作詩者

陸游

我來訪古涪之濱不辭百罔冀一眞走馬朝尋海樓館斫膾夜醉魴魚津越王樓高亦已換俯仰今古堪悲辛督郵官舍最卑陋棟橈楹腐知幾春巋然此壁獨亡恙老槎勁翮完如新向來劫火何自免叱呵守護疑有神狐狸九尾穴中國笑置不問如越秦他時此物合致用下韝指呼端在人會當原野灑毛血坐令萬里清煙塵老眼還憂不及見詩成肝膽空輪囷

題十八學士圖

陸游

隋日昏曠東南傾雷塘風吹草木腥平時但忌黑色兒不知乃有虬鬚生晉陽龍飛雲滃滃關洛萬里卽日平東征歸來脫金甲天策開府延豪英琴書間暇永清晝簪履光彩明華星高參伊呂列佐命下者才氣猶崢嶸但餘一恨到千載高陽繆公來竄名老奸得志國幾喪李氏誅徒連孤嬰向令亟念履霜戒危亂安得存勾萌眾賢一佞禍尙爾掩卷涕淚臨風橫

蒸暑思梁州述懷

陸游

宣和之末予始生遭亂不及遊司井從軍梁州亦少慰土脉深厚
泉流清季秋嶺谷浩積雪二月草木初抽萌夏中高涼最可喜不
省舉手驅蟲蠹藏冰一出賣滿市玉璞堆積寒崢嶸柳陰夜卧干
駟馬沙上露宿連營兵胡笳吹墮漾水月烽燧傳到山南城最思
出甲戌秦隴戈戟徹夜相摩聲兩年劍南走塵土肺熱煩促無時
平荒池昏夜蛙閣閣食案白日蠅營營何自王師自天下雷雨頃
洞收欖槍老生衰病畏暑濕思卜鄠杜開柴荆

題明皇幸蜀圖

陸游

天寶政事何披猖使典相國胡奴王弄權楊李不足怪阿瞞手已
裂紀綱八姨富貴尙有理何至詔書褒五郎天寶末下詔雪張易之兄弟盧龍
賊騎已洶洶丹鳳神語猶琅琅人知大勢危累卵天稔奇禍如崩
墻臺省諸公獨耐事歌詠功德卑虞唐一朝殺氣橫天末匹馬西
犇幾不脫向來詔子知幾人賊前稱臣草間活劔南萬里望秦天

行殿春寒聞杜鵑老臣九齡不可作魚蠹蛛絲金鑑篇

龍洞

陸游

峭崖磨天如立壁枿根橫走松倒植呀然一岫驚倒人空洞坡陁
三百尺幽陰宜為異物託角爪痕存猶可識想當蟠螫未奮時腥
風逼人雲觸石一朝偶為旱歲起卷海作雨飛霹靂向來伊呂正
如此莘渭千年有遺迹我欲酌酒招蜿蜒安用辛苦常行天太平
海內多豐年歸來故祠聽管絃

冬夜聞雁有感

陸游

從軍昔戍南山邊傳烽直照東駱谷軍中罷戰壯士閑細草平郊
恣馳逐洮州駿馬金絡頭梁州毬場日打毬玉杯傳酒和鹿血女
眞降虜彈箜篌大呼拔幟思野戰殺氣當年赤浮面南遊蜀道已
低催猶據胡牀飛百箭豈知蹭蹬還江邊病臂不復能開弦夜聞
雁聲起太息來時應過桑乾磧

夜夢與數客觀畫有八幅龍湫圖特奇客請予作詩其上書

數十字而覺不復能記明且乃追補之亦髣髴夢中意也

陸游

高堂閱畫娛嘉賓巨幅小卷縱橫陳其間一圖最傑作命意落筆
驚倒人奇峯峭立插地軸飛瀑崩瀉垂天神壽藤老木幻荒怪深
潭危棧愁鬼神忽然白晝起雷電始覺異物蟠齋淪陰雲四興誅
老魅甘澍連夕蘇疲民豈惟陂澤苗盡立已活億萬介與鱗文章
與畫共一法腕力要可回千鈞錙不到便懸隔用意雖盡終苦
辛君看此圖凡幾筆一一圓勁如秋尊乃知世間有絕藝天造草
昧參經綸吾言未竟且復止剩發幽奧天公嗔

送襄陽鄭師唐老

陸游

鄭侯骨相非復常伏犀貫額面正方聲名赫奕動天子家世富貴
連椒房武能防秋北平道文合落筆中書堂畿西謀帥國大事當
宁久弄黃金章一朝丹詔自天下兩班仰首看騰驤鄭侯此行端
可羨繡旗卓纛戈如霜三更傳令出玉帳平旦按陣來毬場宿兵

萬竈盡貔虎牧馬千羣皆驕驕酒酣賦詩幕府和縱橫健筆誰能
當雖然鄭侯志意遠虎視直欲吞北荒榆林雁門塞垣紫孟津砥
柱河流黃出師有路吾能說直自襄陽向洛陽

題尊信齋

陸游

吾友陳希真求序名其書齋予告之曰韓文公言讀孟軻
書然後知孔子之道尊晚得楊雄書益尊信孟氏因雄書
而孟氏益尊予謂孔子豈待人而尊孟子亦豈待人而信
韓之言則過矣然尊信孔孟者實學者之本務也請以名
君齋且為詩以終吾意

於戲孔孟何其卓如天日月地海嶽正令舉世皆楊墨邪正豈復
勞商榷雖然此道久橫流執熱其誰不思濯魯鄒遺書世皆讀要
以尊信為善學吾友希真蓋其人不肯俛首為齷齪羹藜飯豆欲
老矣功雖未竟志則慤我居山陰子在閩闕然不見千里邈澤中
久雨道路絕叩戶忽聞聲剝啄尊信二字子所知妙質豈復須斤

斷伏生九十語已訛失且自慚猶喔喔

南宋文範卷八

三

南宋文範卷八

南宋文範卷九目錄

七言古詩

李仁父寄茯苓酥賦長句謝之

張栻

靈碧道旁怪石

樓鑰

它山堰

題高麗行看子

樓鑰

跋李少裴修禊序

樓鑰

跋余子壽所藏山谷書范孟博傳

樓鑰

送伯舅汪運幹

樓鑰

讀范吏部三高祠堂記

樓鑰

大龍湫

王阮

題嚴陵釣臺

張續

奉陪李安撫大卿登八陣臺觀忠武侯諸葛公遺像偶成長

句全蜀藝文志

南宋文範卷九目錄

一

李仲永墨梅

姜特立

金山海書記寄七騎圖

周孚

過浯溪讀中興碑

王炎

憶筇杖

陳傅良

孔鍊士話龍虎山之勝於其行因以送之

葉適

厭原山中曉行

裘萬頃

畫虎圖 合璧事類別集

游次公

南嶽

戴復古

杜甫祠

戴復古

伏龍山民宋正甫湖山清隱廼唐詩人陳陶故圃會景建作

記俾僕賦詩

戴復古

盧申之正字得春郊牧養圖二本有樓攻媿先生題詩且徵

予作

戴復古

黃州棲霞樓卽景呈謝深道國正

戴復古

鄂渚張唐卿周嘉仲送別

戴復古

會稽山中

戴復古

分題得漁村晚照

徐照

題潤州多景樓

劉過

送王孟玉歸山陰

姜夔

送項平甫倅池陽

姜夔

次韻誠齋送僕往見石湖長句

姜夔

安大使丙生日

魏了翁

挹仙亭

真德秀

送絜齋倉使袁都官歸班

趙汝燧

己亥題茅山玉晨觀

李曾伯

明皇按樂圖

劉克莊

題龍眠十八尊者

劉克莊

江行萬里圖

黃大受

己亥八月二十一日除書予拜太平興國宮祠官呈趙季茂

岳珂

觀秋潮

徐集孫

扣角

方岳

豆苗

方岳

洞霄山隱齋

洞霄詩集

間九成

乙丑良月遊大滌洞天書於蓬山堂

洞霄詩集

周密

鄂州南樓

鄭起

贈秘書王監丞

文天祥

至日和謝愛山長句

文天祥

送厲元吉出尉烏程

謝枋得

題定武蘭亭副本

王柏

芸牕集畫圖

何夢桂

贈寫照唐子良

謝翱

寄洞霄道友清溪翁

家鉉翁

謁子陵祠

林景熙

寄友

鄧牧

漢陽郎官湖

鄧牧

上元日陳丞相宅觀燈有作

方鳳

翠微樓對竹會飲

方鳳

送吳立夫

方鳳

藺五兒訪

谷音

師巖

西域圖

黃文雷

南海南

宋詩紀事

陳森

張德裕盤谷隱居

于石

四時讀書樂四首

宋詩紀事

翁森

南宋文範卷九

長洲顧少卿先生鑒定

秀水莊仲方編

七言古詩

李仁父寄茯苓酥賦長句謝之

張栻

岷峨山中千載松枝虬幹直摩青空雪霜剝落中不槁膏液下與
靈泉通龜跬伏自磊砢金堅玉潔仍豐融篝燈夜取喜得雋煮
鼎朝聽如吟風杵成坐上看飛雪更和酪乳收全功當知至味本
無味子若服之壽無窮巽巖脊梁硬如鐵冠峩切雲佩明月百好
都隨春夢空大藥獨傳鴻寶訣中宵咀嚼不搖頭玉池生肥燕不
徹憐我百慮形早衰襄贈扶持意何切丹砂著根謾爾傳脂澤釀
黍計已拙由來妙道初不煩此法莫從兒輩說徑思舉袂揖浮邱
下視塵世真一呷朱顏留得亦何為追逐同堅歲寒節

靈碧道旁怪石

樓鑰

飽聞茲山產奇石東南寶之如尺璧誰知狼籍亂如麻往往嵌空

類鏡刻長安東南萬歲山搜抉珍怪窮人間汴流一舸載數輩經
上良嶽增孱顏當時巧匠斲山骨寘之江干高突兀干戈動地胡
塵飛坐使奇材成棄物君不見黃金橫帶號神運不數臺城拜三
品只今零落荒草中萬古淒涼有遺恨木人漂漂不如土坐閱興
亡知幾許行人沈嘆馬不前石雖不言恐能語

它山堰

樓 鑰

它山堰吾鄉絕境也屢遊而不及賦近過其上得前四句
而歸季夏鬱蒸午寂無事因足成篇寫罷長吟遐想勝地
頓覺風生兩腋汗垢俱清比之陵陽冷語尤為消暑上策
也

它山堰頭足奇觀百萬雷雷聲不斷誰把并州快剪刀平翦波瀾
成兩段四明山深水源遠眾壑會溪長漫汗滔天狂潦不少留瀉
入長江勢奔竄賢哉唐家王長官欲圖永利輸長算想得慘澹經
營時下上山川應飽看四福千嶺桐屬聯惟有茲山擁東岸遂於

此地築橫埭截取眾流心自斷斟酌利害不全取高下參差僅強
半水大十分七八江徐挹三分供漑灌支流瀾瀾穿郡城脉絡貫
通平且緩旱時反此水亦足坐使千年忘旱暵無窮廟祀報元功
像設森嚴人敢玩梅梁天矯有冥助大患於今尚能捍前輩所作
多神靈日月真成赤心貫後人小智或更易費盡工夫隨破散河
堰盡浚謀不集堤斷河傾流甚悍富民束手人受殃仰望古人重
興嘆老木號風波湛碧畫屏俯仰丹青煥更須積雨看驚湍濡足
褰裳何足憚去家不遠時一遊短艇垂綸流可亂八月倘有仙槎
來便欲乘之泝天漢

題高麗行看子

樓 鑰

高麗賈人有以韓幹馬十二匹質于鄉人者題曰行看子
接處黃綾上書韓幹馬表飾以綾尾以精紙皆麗物也聞
其懷金來取因命工臨寫而歸之再用東坡韻書臨本之
後

竹披雙耳風入蹄霜鬣翦作三花齊相隨西去皆良種撼首勢竄
迎風嘶丹青不減陸與顧麗人傳來驛通語裝為橫軸看且行云
是韓幹非虛聲圉人乘馬如乘鶴人馬相諳同呼啄中有二匹真
遊龍爬梳迴立綠楊風賈胡攜金贖此馬亟呼工人臨舊畫我詩
無分到三韓寫向新圖時自看

跋李少裴修禊序

樓鑰

唐文皇之賜韓王有崔潤甫之題為可攷若李重光撥鐙
書斷然無能效之者其為真筆何疑朱徐開皇之記則已
見少裴之辨開元去正觀未遠潤甫又職校定四部圖書
以為最善本則真善矣辨才之本既殉昭陵今世止以定
武本為第一又出歐陽率更所臨石本似應在墨蹟之下
則知此本信為冠絕蓋希代之寶也然考之新舊唐史崔
湜弟液滌及從兄泣並有文翰居清要液至殿中侍御史
液弟滌明皇用為祕書監出入禁中後賜名澄如此則液

為湜之親弟而為祕書監者滌也又宰相世系表博陵安
平崔氏仁師相太宗高宗次子擢擢之子液吏部員外郎
第四子挹挹之子湜相中宗湜之弟滌祕書監如此則液
為湜之從弟又不為祕書監傳之與表已自不同而液之
親筆乃爾以是知作史與考古之難也因併述之仍賦長
句以副少裴好古之意

蘭亭修禊永和中羣賢高會俱雍容右軍作序亦偶爾藁草乃致
傳無窮自言疑若有神助他日屢書終不同歷代傳實在祕府尤
其甚者唐太宗當時搜取極心力摹本一一頒羣公惟此真蹟最
奇絕蕭梁開皇有遺踪親御奎文賜元嘉龍蟠鳳翥何其工辨才
所取祕昭陵此本一洗凡馬空崔家兄弟列清要海子況復稱龜
龍圖書四部資校讎當時尚有正觀風自云此為最善本冰銜臣
液題甚恭李王深得撥鐙法筆力絕勁雄江東右軍以來皆妙筆
名勝異代如相從病餘扶僊行掃松李君攜來為發蒙平生多有

南州文獻卷之九
舊墨本一見使我開心胸摩挲嘆息不自己至寶盍入明光宮隱
居懷寶正不惡異氣或能斗牛衝叩門有客勿傾倒恐有御史來
乘驄

跋余子壽所藏山谷書范孟博傳

樓 鑰

山谷晚在宜城或求作字谷問欲何書則曰惟先生之意
谷許以書范孟博傳或謂南方無復書谷曰平時好讀此
傳遂嘿誦而書之舊聞此說又知在上饒大夫家願見不
可余子來入判幕博記善屬文偶談及此又出摹本及尊
公跋語始知其爲先世舊物也爲賦長句

宜人初謂宜於人菜肚老人竟不振承天院記顧可罪一斥致死
海南濱賢哉別駕眷遷客不恤罪罟深相親袞袞不容處城闔夜
遣二子從夫君一日攜紙句奇畫引筆行墨生烟雲南方無書可
尋閱默寫此傳終全文補亡三篋比安世偶熟此卷非張巡巖巖
汝南范孟博清裁千載無比倫坡翁事母曾啟問百謫九死氣自

伸別駕去官公亦已身雖旣衰筆有神我聞此書久欲見摹本尙
爾况其真輟公清俸登堅珉可立懦夫羞佞臣

送伯舅汪運幹

樓 鑰

人生自古悲別離別離今日何足悲試問今日行者誰鄞江名族
眞男兒虹鬚燕頰軀十圍凜凜端有熊豹姿毅然剛立不怒威笑
視鼠輩何脂韋州縣小試囊中錐政績今在眾口碑姓名通籍黃
金闈便泛王儉紅蓮池平時幕府多素尸生糜公粟遊以嬉只今
方當多事時正要名士同驅馳森森百萬虎與貔荷戈分駐淮東
西兩淮千里雙使麾幕中僚吏皆耀犀惟公婉畫明著龜辨如懸
河不可隄胸中武庫深難窺決策固有堂上奇翔風吹空黃草齊
正恐秋高胡馬肥萬人相顧目睽睽見公此去多腹非公獨襍被
行不疑單車西去征馬嘶平生氣槩銜虹霓恨無尺箠笞羌夷方
今天相中興期黠虜戴頭來邊陲願公速蹈功名機匈奴不滅何
家爲出門千里何足辭但願滿引金屈卮

讀范吏部三高祠堂記

樓鑰

三高之風天與高三高之靈或可招小山以後無此作具區笠澤空寥寥幾從垂虹蕩雙槳寓目滄浪獨悵筆端不倒三峽流欲遽招之恐長往前身陶朱今董狐襟抱磊落吞江湖瑰詞三章妙天下大書深刻江之隅我來誦詩凜生氣若有人兮在江水扁舟獨釣膾鱸魚茶竈筆牀歸甫里先生同是邱壑人只今方迫功與名謝公捉鼻恐未免便看林藪生風雲他年事業滿彝鼎乞身歸來坐佳境不嫌俗士三斗塵容我漁蓑理烟艇

大龍湫

樓鑰

北上太行東禹穴鴈蕩山中最奇絕龍湫一派天下無萬眾贊揚同一舌行行路入兩山閒踏碎苔痕屐將折山窮路斷脚力盡始見銀河落雙闕矩羅宴坐看不厭騷人弄詞困搜抉謝公千載有遺恨李杜復生吟不輟我遊石門稱勝地未信此湫真卓越一來氣象大不侔石屏倚天驚鬼設飛泉直自天際來來處益高聲益再來看淨洗一身煩惱熱

題嚴陵釣臺

王阮

題釣臺多矣大槩高之爾未有明其意者也光武旣定天下深懲王氏之禍原於張禹孔光之流故昔之所謂坐論者一切吏之時或叱咤侯霸等俛首而已先生道高千古豈能堪此雖以禮聘不以禮答項枕臥語又從而躡踐之使知已之不足驕士卒不少留古語云使麒麟可係而羈兮豈云異夫犬羊此則先生之志也其首陽之流乎爲賦小詩以發千載一笑

西都庸庸生禍胎東都切切繩公台平生故人苦畏辱坐定白雲那肯來沈幾深略滿帝腹且憩先生一雙足使知天上麒麟兒不

似犬羊甘豢畜渭濱老叟不自持爲人人以鷹名之豈識桐江一竿竹依舊秋風魚正肥古來賢者亦避世往往適逢天地閉得如建武亦不惡又值首陽難降志山木陰陰江面寒此天別在壺中寬幾曾流出桃花去寶氣自駭人閒觀當時不願世知已稱到於今卻如此塞馬得失天好還千駟齊侯不窮理

奉陪李安撫大卿登八陣臺觀忠武侯諸葛公遺像偶成長

句

張續

白帝城西魚復浦十月江平見津濟當年累石紛成行此地臥龍經講武轅門外建巖中權自注陣有壁壘一門東出列陣相承存後伍自注八陣相承又列數陣于後何人蛇勢識常山未數魚麗矜鄭拒懸知精神貫金石尙想號令嚴鉦鼓老兵料敵應疑生川后澄波其敢侮向令赤伏有餘符下睨皇州眞指取云何遺跡司神明獨靳豐功被寰宇高城置酒共臨眺往事興懷增歎撫巍然王佐三代前信矣名言照千古

李仲永墨梅

姜特立

寫竹如草書患俗不患清畫梅如相馬以骨不以形墨君曩有文夫子蟬腹蛇跗具生意當時一派屬蘇公雨葉風枝略相似花光道人執天機信手掃出孤山姿陳元幻卻西施面此妙俗人那能知近時賞愛楊補之補之娥媚不足奇李生于梅卻有得高處自與前人敵倒暈疏花出苦心暝雲暗谷藏春色我一見之三歎息意足不暇形摸索君若欲求之點畫胡不去看江頭千樹白

金山海書記寄七騎圖

周孚

兩騎並驅爭欲前兩騎舍矢俱應弦一騎揮搥一負箭一騎力挽弓初圓寒風蕭蕭沙漠漠封豨可擒熊可搏漢家飛將未出關政使渠儂尋此樂君不見往年胡瓌寫此圖宛陵詩翁最愛渠戲將醉墨作長句歲月政當嘉祐初故家文物今星散老筆從誰辨眞廣滾滾走馬大梁城對君此畫空三嘆

過涪溪讀中興碑

王炎

日光玉潔元子辭銀鉤鐵畫顏公書百金不憚買墨本摩挲石刻
今見之猗那清廟久不作其末變爲王黍離春秋一經事多貶魯
頌四篇文無譏漁陽鼙鼓入潼華公卿徒步從六飛朔方天子扶
九廟京師父老迎千麾紫袍再拜謁道左上皇萬里旋鑾輿牝味
鳴晨有悍婦孽狐噪夜有老奴扶桑杲杲未翳蝕但歌大業吾何
疵首章義正語未婉前輩不辨來者疑正須細讀史克頌未用苦
說涪翁詩許張勁節震金石李郭壯武如虎貔斷崖蒼石有時泐
諸公萬古聲烈垂天憐倦客有所恨雨濕江寒催解維神州北望
三嘆息翰墨是非何議爲

憶筇杖

陳傅良

岷峨山下筇竹杖危者使安衰可壯秦皇漢武窮兵不可得我獨
得之今丞相前年有旨還故園其冬急召朝日邊半歲驅馳數千
里賴有此杖常扶顛倉皇又別修門去私室無人謹呵護夜半雷
霆下取將兒叫妻啼留不住我聞丞相下峽時一物無有杖自隨
屬當晏朝立仗久憐我弱脛疲切螻如今步履隨衰草十步趨起
九步倒假如杖在欲用之山精海怪震怒亦不保君不見杜陵桃
竹歌常恐失之君山湖上之風波梓潼使君之贈尙爾耳況自丞
相還如何

孔鍊士話龍虎山之勝於其行因以送之

葉適

羣嶂倚天傍四環中峯受拱低伏蹲雲錦交流紫團外卻注彭蠡
如傾奔道陵已去丹竈冷今代符行妖鬼靜孔師何事亦逃儒爲
愛冰林雪蒙頂我居無山冬不雪只受虛空滿輪月子能作意肯
重來更待牆東筇堪掘

厭原山中曉行

裘萬頃

碧雞夜半聲啁啾喚起幽人步林樾秋高風露著羣木無數寒花
泣明月松篁一徑宛如畫石溜涓涓更清絕山巔便好結茅廬莫
待他年鬢成雪

畫虎圖

游次公

平生射虎裴將軍馬猛如龍弓百鈞手撚白羽旁無人注虎使虎不敢奔須臾叢薄爛斑出人馬不知俱辟易矢如蓬蒿弓減力將軍得歸幾敗績徐行爪牙無不露眈眈垂頭若微顧尾翦霜風林葉飛倏忽山頭日光暮包家畫出真於菟我尚不敢編其鬚昔人作詩譏畫圖吁嗟畫圖今亦無

南嶽

戴復古

南雲縹緲連蒼穹七十二峯朝祝融凌空棟宇赤帝宅修廊翼翼生寒風朝家遣使嚴祀典御香當殿開宸封願福四海扶九重干戈永息年屢豐五嶽惟今見南嶽北望乾坤雙淚落

杜甫祠

戴復古

嗚呼杜少陵醉臥春江漲文章萬丈光不隨枯骨葬平生稷契心致君堯舜上時兮弗我與屹然抱微尚干戈奔走蹤道路飢寒狀草中辨君臣筆端誅將相高吟比興體力救風雅喪如史數十篇才氣一何壯到今五百年知公尙無恙麒麟守高阡貂蟬入畫像

一死不幾時聲迹兩塵莽何如耒陽江頭三尺荒草墳名如日月光天壤

伏龍山民宋正甫湖山清隱迺唐詩人陳陶故圃曾景建作

記俾僕賦詩

戴復古

故人昔住金華峯面帶雙溪秋水容故人今住伏龍山陳陶故圃茆三間千載清風徐孺子門前共此一湖水百花洲上萬垂楊白鷗羣裏歌滄浪故人心事孺子高故人詩句今陳陶短衣飯牛不逢堯何如繡鞍上著錦宮袍瓦盆對客酌松醪何如紫霞觴泛碧蒲萄豆萁燃火度寒宵何如玉堂夜照金蓮膏吟成秃筆寫芭蕉何如沈香亭北醉揮毫再三問君君不對目送飛鴻楚天外細讀山中招隱篇超然意與烟霞會照影湖邊雙鬢皓此計知之悔不早三椽可辦願卜隣荷鋪相隨種瑤草

盧申之正字得春郊牧養圖二本有樓攻媿先生題詩且徵予作

戴復古

竹弓鳴雁鴨驚飛來別浦無人境春風不搖楊柳影長頸紛紛占
作家半游波面半眠沙或行或立或如舞或隻或雙或羣聚飲啄
浮沈多態度物情閑暇世忘機分明一片太古一作平時巧偽不作
民熙熙

我之居元在野平生慣識牛羊者今見浦江出此圖半日不知渠
是畫一犍當前轉頭立一犍度浦毛猶濕中有一蒼騎以牧牯犛
相隨數千足殿後兩枚黃殼鯨分明如活下前坡路轉山南春草
多耳根只欠牧兒歌

黃州棲霞樓卽景呈謝深道國正

戴復古

朝來欄檻倚晴空暮來烟雨迷飛鴻白衣蒼狗易改變淡妝濃抹
難形容蘆洲渺渺去無極數點斷山橫遠碧樊山諸峯立一壁非
烟非霧籠秋色須臾黑雲如潑墨欲雨不雨不可得須臾雲開見
落日忽展一機雲錦出一態未了一態生愈變愈奇人莫測使君
把酒索我詩索詩不得呼畫師要知作詩如作畫人力豈能窮造

化

鄂渚張唐卿周嘉仲送別

戴復古

武昌江頭人送別楊柳秋來不堪折漢陽門外望南樓昨日不知
今日愁英雄握手新相識人情正好成南北酒闌人散最關情一
雁西飛楚天碧

會稽山中

戴復古

曉風吹動花梢雨青山白雲無唾處嵐光滴翠濕人衣踏碎瓊瑤
溪上步人家遠近屋參差半成圖畫半成詩若使山中無杜宇登
山臨水定忘歸

分題得漁村晚照

徐照

漁師得魚繞溪賣小船橫繫柴門外出門老婦喚雞犬收斂蓑衣
屋頭曬賣魚得酒又得錢歸來醉倒地上眠小兒啾啾問煮米白
鷗飛去蘆花烟

題潤州多景樓

劉過

金山焦山相對起挹盡東流大江水一樓坐斷水中央收拾淮南
數千里西風把酒閑來遊木葉漸脫人閒秋烟塵茫茫路渺渺神
京不見雙淚流君不見王勃才名今蓋世當時未遇庸人爾琴書
落魄豫章城滕王閣中悲帝子又不見李白才思真天然時人未
省爲謫仙一朝放浪金陵去鳳凰臺上望長安我今四海行將遍
東歷蘇杭西漢沔第一江山最上頭天下無人獨登覽樓高思遠
愁緒多樓平樓乎奈汝何安得李白與王勃名與此樓長突兀

送王孟玉歸山陰

姜夔

淮南雪落雲繞戍王郎鳴鞭獵狐兔問君本是山陰人何不扁舟
剡溪去人生樂事將毋同知君此心如太空只今去踏龍尾道也
似寒江蓑笠翁鑑湖一曲荷花浦君不歸來花有語舊宅應添竹
幾竿到家不覺秋如許十年雪裏看淮南聚米能作淮南山籌邊
妙處須急吐政自不容修竹閒人道長江無六月日光正射青蘆
葉何以贈君濯炎熱雪卽是詩詩是雪

送項平甫倅池陽

姜夔

項侯聲名天宇窄與君俱是荆湖客向來相聞不相值長安城中
乃相識論文要得文中天邯鄲學步終不然如君筆墨與性合妙
處突過蘇李前我如切切秋蟲語自詭平生用心苦神凝或與元
氣接屢舉似君君亦許西湖一曲古牆陰清坐論詩夜向深見謂
人閒有公等不知來者不如今乾坤雖大知者少君不見古人拙
處今人巧我徂山林口挂壁如君合救狂瀾倒石渠春水綠泱泱
閣下無人白日長萬里江湖八歸夢子雲不願校書郎九華山色
梅根渡半日風帆卽秋浦六條察吏安用許幸有千巖作詩侶

次韻誠齋送僕往見石湖長句

姜夔

客來讀賦作雌蜺平生未聞衡說詩省中詩人官事了狎鷗八夢
心無機韻高落落懸清月鏗鏘妙語春冰裂一自長安識子雲三
嘆郢中無白雪范公蕭爽思出塵有客如此渠不貧堂堂五字作
城守平章勁敵君在口二公句法妙萬夫西來橐中藏魯瑣只今

擊節烏棲曲不愧當年賀鑑湖

安大使丙生日

魏了翁

往年天壓西南陲妖氛內訌胡塵飛烏狐陸梁士扼腕蜀山慘澹
無光輝公以空拳嬰乳虎漠漠黃雲闇平楚直將天理感人心徑
斬賊頭報明主露布東馳人嘯呼京師觀者環儲胥天顏有喜近
臣賀大官高爵來須臾中興以來幾變易宗社之存如旒綴平江
羽檄走凶雛采石歟船戮狂獠至今勛名滿華夷與公鼎立書旗
彝公方退然不自居憂國之鬢紛如絲天之生公為社稷南山不
騫石不泐願公早歸相天子赤舄晨朝容几几

挹仙亭

真德秀

漢宮葦篴兒呱呱濟南梓柱陰扶疏富平家人正媮樂安昌帝師
工獻諛子真東南一尉耳黃綬淒涼百僚底手持短疏叩天闈義
激丹衷淚橫眦翩然一朝逕拂衣愛君無路空依依人傳九江已
仙去吳門再見是耶非神仙茫茫那可測上帝從來賞忠直天上

果有驂鸞人合領羣真朝北極自從舉手謝世閒千年白鶴何時
還玉簫聲斷杉檜冷祗餘丹竈留空山谷口之孫古虜使亭斷青
冥挹仙袂耿耿應懷貫日忠飄飄那羨凌雲氣我來快讀華星篇
清徹毛骨風冷然何當結屋最高頂一榻容我分雲烟

送絜齋倉使袁都官歸班

趙汝燧

六轡按部朝出關郵鈴插羽夜趣還詔字天飛紫泥濕一點郎星
歸拱北鄉來翻動大壑魚致君堯舜真須臾金甌未啟請麾去旋
頒漢節登范車先生有道出洙泗派分象山接洛水振鐸重席闡
聖傳此心之外無二理先生有才輩伊周胸襟百萬森戈矛新亭
肯作楚囚泣誓楫一念清神州此行豈但蘭再握講帷欠公熙帝
學火城照空沙隄新堂印押班運籌幄絜齋牆仞世龍門辦香夙
昔鑽仰心邑債一了即歸耕但當拭目天上新經綸日與漁樵擊
壤歌太平

己亥題茅山玉晨觀

李曾伯

烟雲作嶂松作關夜深迫人星斗寒分明已在天上坐不可更作
人閒看須臾睡去復睡覺彷彿前生在富壑洞門鎖鑰呼未磨時
有天香暗飄落

明皇按樂圖

劉克莊

鶯啼花開春晝遲掖庭無事方遨嬉廣平策免曲江去十郎談笑
居台司屏閒無逸不復覩教雞能鬪馬能舞戲呼寧哥吹玉笛催
喚花奴打羯鼓南衙羣臣朝見疏老伶巨璫前後趨阿瞞半醉倚
玉座袖有曲譜無諫書金盆皇孫真龍種浴羅六宮競圍擁惜哉
旁有錦綉兒蹴破咸秦跳河隴古來治亂本無常東封未了西幸
忙輦邊貴人亦何罪禍胎似在偃月堂今人不識前朝事但見斷
縑妝束異豈知當日亂離人說著開元總垂淚

題龍眠十八尊者

劉克莊

嘗聞天台肉身往無從仁夫示此圖恍惚遊其中應真一一若
舊識或踞怪石臨飛淙山鬼投牒何敬恭天女問法尤丰茸盆魚

善鬣等針粟放去天矯擎空濛山深無人地祇出被服導從侔王
公前驅驚獸後夔魍徐行殿以一瘦筇巉巖蒼壁謾謾松下有老
宿眉雪濃石橋滅沒雲氣斷似是鬼國非天工層冰融結挾怒瀑
毒虺噴薄含腥風至人於此方入定壞衲冪首枯株同等閑一坐
六十劫汝技有盡吾無窮書生往往談性命怵以禍福猶兒童倒
持手版口勸進對此寧不面發紅我知龍眠筆外意要與濁世鍼
盲聾退之云釋善變幻愷之謂畫能神通幻耶神耶兩莫詰與之
持叩西山翁

江行萬里圖

黃大受

雪山西來接海白天之所以限南北誰人胸裏著輿圖揮斥荆吳
入綃墨濃濃淡淡兩岸山烟波瀾漫江面寬水空漠漠鳥飛絕漸
看漸遠天漫漫客舟泝流先後去風帆飽腹如飛舞有時小艇絕
波來不知何處橫江渡鍾山隱隱開金陵雨花臺前留玉京汀洲
劣處小孤出垂楊綠引潯陽城斬黃紫翠照卷雪武昌樓臺半明

滅周郎赤壁杳難憑洞庭寒烟濛孤月西江耿耿沙溜清三十六
灣斜照明黃陵廟深楚山闊九疑成削黏天青我來展軸驚快靚
恍然對面水仙府片時行盡江南天弔古何勞出門去南巡真人
忘卻歸軒轅龍去渺難追咸池曲絕誰奏樂風雨啼痕滿竹枝六
朝虎視工設險蹴踏滄波當揮劍血流不惜惜江流肯放飛埃過
天塹濫觴習聞蕩雍邱楫聲若爲空悠悠江聲至今恨不盡枉白
萬古英雄頭兩階干羽亭波后八公草木今健否長安正在碧雲
邊斜日西風重回首

己亥八月二十一日除書予拜太平興國宮祠官呈趙季茂

岳珂

世閒何物最是閑司諫拂衣歸華山倦來忘記省不得依約此語
祥符閒終南捷徑本自錯老子新司紫元鑰官家雇我作閑人有
酒醉呼端不惡歲糜廩粟月俸錢黍鶴有料芝有田人生何必待
有用我老得此寧非天君不見當年把臂龍圖上司諫放歸元未

放又不見倦翁山行醉復醒說著拂衣今亦忘

觀秋潮

徐集孫

八月西風噓沆瀣長江協候肆澎湃錢唐王氣天所鍾非爲子胥
逞靈怪海門三山縹緲青雙練夾岸奔雷霆蛟龍鼉鼉匿形影銀
濤雪浪翻滄溟踏浪羣兒慣行險出沒波心旗閃閃須臾激濤潮
信平蕩漾漁舟千萬點天低暮靄襲人衣遊子興盡各云歸獨有
騷翁看不足吟到夜月揚清暉

扣角

方岳

東家打麥聲彭魄西家縑絲雪能白中間草屋眠者誰不農不桑
把書冊書中宇宙三千年凡幾變滅成飛烟不知讀此竟何用蓬
藿挂逕荒春田東家麥飯香撲撲西家賣絲糴新穀先生帶經駕
黃犢扣角前坡烟水綠

豆苗

方岳

江南之筍天下奇春風匆匆催上籬秦郵之薑肥勝肉遠莫致之

長負腹先生一鉢同僧居別有方法供齋蔬山房掃地布豆粒不
煩勤荷烟中鋤手分瀑泉灑作雨覆以老瓦如穹廬平明發視玉
髯磔一夜怒長堪冰直自親火候瀾魚眼帶生芼入晴雲盃碧絲
高壓涎滑尊脆響平欺辛罄瘳晚菘韭各一時非時不到詩人
脾何如此雋咄嗟辨庾郎處貧未爲慣

洞霄山隱齋

聞九成

餘杭之山天柱峯下有石洞蟠蒼龍齋居無塵山四合仙人宴坐
空翠中夜捫北斗罡氣接晨吸東日精光通醉凌高峯駕白鶴笑
視黃庭驅玉童人閒自有赤松子方外或友洪崖公丹泉吹陰曉
霧碧野果變色秋山紅獻酬且盡琉璃鍾笑談便是蓬萊宮肯如
金粟衰病翁散花丈室談虛空

乙丑良月遊大滌洞天書于蓬山堂

周密

太虛灑氣浮空濛烟霞九鎖蓬萊宮崩騰雲木競奇秀澗芳野實
垂青紅何年斷鼇立天柱古洞陰森白鴉舞玉書寶劍不可尋老

翠封崖滴元乳光芒靈氣干斗牛遺丹箬底誰能求黃精紫氣徧
巖谷仙禽夜擣聲悠悠懶蛟千年睡未足癡泉吼雷噴飛瀑陰風
黑穴吹海腥石虎當關橫地軸是非萬古同一嘅神仙不死今安
在

鄂州南樓

鄭起

淳祐六年冬十月我來獨自上南樓曉霧江山都不見霧收日出
城東頭照見漢陽樹照見鸚鵡洲浪濤江漢出岷峽洞庭雲夢天
共流大船如龍捲寒碧小船如葉飛洪溝湘靈霞珮跨黃鵠洞庭
玉笛橫清秋沈寥突兀不可狀開闔風雨晴烟浮空中一一都照
見照見今來古往絲粟無限愁夜郎逐客心膽大醉欲槌碎醒又
休此山此水長不老英雄消盡山水留何當大雪夜明月摩挲老
眼看九州春風吹雪變紅綿牛羊被野邊無憂

贈祕書王監丞

文天祥

君不見祕書外監賀放翁鏡湖一曲高淸風又不見太子師傅兩

疏氏東門祖帳羅羣公人生晚節良不易頽波直下誰障東使人
知有在我者二三君子爲有功我公金華山下住赤松安期白雲
處風骨細瘦眞神仙急流勇退不肯顧我昔山中想風采幾回擊
節歸田疏適來追隨水蒼佩親見辭歸白雲路御筆擢公領蓬山
師表玉立東宮官兩年苦口一去字未許鷗鷺從公閒瑤池深深
鎖策府玉皇宮闕僑其閒暫分赤符管下界半空雲氣常往還多
少持麾辭上國悠悠風塵見此客莫作尋常太守看疏賀以來偉
人物夜瞻婺女次舍中一點光明射南極公歸眠食重調護世道
尚憑公氣力

至日和謝愛山長句

文天祥

寓形落落大塊閒嘔吸一氣自往還桑弧未了男子事何能局促
甘囚山昔年此日作初度賓客如雲劇歌舞今年避影卻閉門捧
觴自壽白頭母故人憶我能遠來虹光滿袖生瓊瑰一杯相屬慰
岑寂使我發笑愁顏開簸揚且聽箕張口丈夫壯氣須衝斗夜闌

扶劍碧光寒握手相期出雲表

送厲元吉出尉烏程

謝枋得

十二街頭三尺雪駿馬健行如跛鼈生懷故人厲半村拂袖前行
何勇決疊山居士強欲吟凍筆如椎硯欲裂京國青衫千載交欲
言不言情哽咽願君勿作繞指柔願君勿作在鑛鐵甘雨幽遐寃
草甦清風宇宙貪泉竭循良甯困聖明時玉燭光華待調燮

題定武蘭亭副本

王柏

玉華末命昭陵土蘭亭神蹟埋千古率更搨本人堅珉鹽帝歸裝
投定武薛家翻刻愚貴遊舊石宣和龕御府胡塵橫空飛渡河中
原荆棘穴豺虎維揚蒼茫駕南轅百年文物不堪補紛紛好事競
新模傾敝醜俗無遺矩如今薛本亦罕見髣髴典刑猶媚媮清歡
盛會何足傳右軍它帖以千數託言此筆不可再慨然陳迹興懷
語今昔相視無幾時手掩塵編對秋雨

芸窗集畫圖

何夢桂

天馬不生韓幹死雀白翎毛落蒿里虎頭妙筆夜通靈主爵郎中
修書史楊君畫眼空四海賸把金奩貯奇詭
騎一縱驂與驅阿誰青驄嚼金勒拔劍奔逐髯怒虬提弓空捍鳴
鏑盡塵沙馬耳風颼颼篋管谷中一梢出冷蕊相看冰雪骨葵花
二色空爭妍沒骨丹青輸水墨猿猱兩兩雄願雌獐鼠伎伎母趁
兒水禽並下照秋水足踏枯荷浸漣漪人間清景能幾許野馬戰
場祇尺咫芸窗一幅水沈烟俯仰乾坤千古意

贈寫照唐子良

謝翱

吳中眾史今代畫不獨畫人兼畫馬唐生家住金華雲對子獨肯
畫古人夕陽西下東流水紛紛古人呼不起東都留守吳中豪王
府勳僚舊俊髦當時氣薄陰山日勾陳蒼蒼太白高百年水竭海
塵上誰見淩雲拂蛛網霜髯磔磔開清新彷彿猶帶黃河冰忽疑
稍會怒色止或可從旁窺諫紙唐生見我淚如洗頗憶古人今不
死俟我氣定神始閒命筆更起唐衣冠

寄洞霄道友清溪翁

家鉉翁

漢家中郎年七十霜鬢垂垂人不識冬深破履踏層冰暑到露頭
走赤日窮堅老壯本分事百年未死爲形役洞天九鎖鬱嵯峨古
來相傳神仙宅我嘗結茅天柱前屐齒蒼苔印行跡劫火洞然城
郭非清境不壞還如昔安期羨門我輩人圓嶠方壺一咫尺夢魂
幾度如相逢別來已久知相憶願分仙家九轉丹服之身輕生羽
翼周遊八表任去來驅出陰陽寒暑域

謁子陵祠

林景熙

客星謫下桐江湄傲睨烟雨何年歸空遺清氣滿林壑草木不受
春風肥我來維舟奠椒醑蒨荔祠荒泣山鬼亂峯欲雪江氣嚴老
蜃吹雲日色死白水真人御絳衣勳臣四七攀鱗飛冥鴻遐舉不
可改天地浩蕩容漁磯年年熏貂成黨獄阿瞞朶鼎終瑟縮東都
節義何爲高七尺之臺一竿竹

寄友

鄧牧

我在越君在吳馳書百里遊我遊西湖我還吳君適越遙隔三江
共明月明月可望佳人參差笑言何時寫我相思知君去掃巖陵
墓祇把清尊酬黃土浮雲茫茫江水深感慨空勞弔今古孤山山
下約陳實聯騎須來踏春色西湖千樹花正繁莫待東風吹雪積
有酒如澠有肉如林鼓趙瑟彈秦箏與君沈醉不用醒人生行樂
耳何必千秋萬歲名

漢陽郎官湖

鄧牧

仙翁薄暮醉酒歸杖藜迷卻高陽池清風吹花綠陰倒我笑謂是
秋雲移還乘貫月槎夜過郎官湖崢嶸星斗入漢陽蕩漾槎影如
鯨魚九華之真人邀我倒玉壺麒麟擘脯俱行厨依稀仙樂在空
際碧山四映寒蟾孤舉酒酌寒蟾明月下飲姮娥俱霓裳拂雲錦
萬荷露瀉瓊瑤卮麾幢掩靄羅烟空乃有三皇所授之玉童風前
飄飄曳廣帶對立十二秋芙蓉清香九曲銀河通真人綠髮披春
風錦袍玉雪照天地口說姓字安南公是公多逸氣略與古昔賢

豪同時能掃月色延我石室烟蘿中又言昔同張謂所遊地長歎
一覆丹霞鐘風吹仙樂度溪去我亦醉臥香爐峯

上元日陳丞相宅觀燈有作

方鳳

渴龍入夜吼百川無數鮫珠迸地圓星斗撼天半欲落五花琪樹
皆生烟烟燈豈不勝花朶踏歌何人增坎壈風塵淮北馳羽書金
鼓江城賽燈火君不見狄青宣撫荆湖閒上元張樂宴清班忽然
稱疾燈未滅五更已奪崑崙關

翠微樓對竹會飲

方鳳

縹緲飛樓修竹裏珠簾半捲清風起月明十二畫欄空美人遙隔
湘江水夜深吹徹玉參差引到丹山綵鳳儀還倚仙翁九節杖翠
雲深處望安期楚調歌殘仍擊節簷外紛紛落蒼雪樓頭醉臥笑
元龍一片歲寒心似鐵

送吳立夫

方鳳

有人儲書塞中腸不能奮發爲辭章亦有英姿限時命坎壈名不

登文場吳子妙年卽秀穎隻字過眼終無忘文如翻水溢萬斛晝
夜不舍流湯湯于今東南聚雋彥爽然一發能穿楊二十脫穎客
毛遂名登十九能低昂亦如列宿二十八有球天畢施之行況子
平生志遠遊塊坐已能窮八荒從茲北山有歷覽徑到河洪經呂
梁青徐平野望不極半萬里程趨冀方君不見龍門探奇氣益壯
文豪千載同翱翔

蘭五兒訪

師巖

漢陰美人青兕裘獨騎瘦馬尋荒邱花前下馬迎一笑珠玉在側
形骸羞酒酣散髮箕踞坐錦帶爛爛懸吳鉤刺蛟刺虎好身手碧
瞳如水涵清秋惜哉科目太脫略壯士豈爲章句囚中原格鬪困
不已江波木落寒悠悠

西域圖

黃文雷

大哉天地間品類不可齊誰爲好事人貌此縣度西松花瑣碎沙
草肥是閒可牧羊干蹄可憐羣鹿正走險或爾割剝衣其皮啜渾

樹樺尙有理穴顛插齒吁何爲吾聞中原全盛時重譯四走朝京
師懷方象胥飭乃事幻人詭伎何能奇還君此畫雙涕洟願賦周
官王會詩

南海南

陳森

連弩聲猶黑風壯白日滄浪影相盪神蛟一老還不還淚濕空荒
捲烟浪盤渦蜃氣高矗天老鯨巨鼈那忍眠老鯨已化子獨返越
山越水青茫然樓船夜半猩猩語黃葛花開墜秋雨

張德裕盤谷隱居

于石

盤谷四面環青山晴嵐暖翠浮雲烟盤谷之阻多幽泉湛然深碧
蛟螭盤中有華屋貯神仙猿鳥不驚犬不喧竹侵行徑松礙檐人
疑無路堪攀緣忽聞讀書聲琅然始信別是壺中天翩然振屐登
其顛仰林俯壑天地寬桑麻盡處開平川千帆來往無時閑旁有
一葉漁翁船出沒紅蓼黃蘆邊呼之來泊巖下灣就船買魚歸烹
鮮煮茗有泉林有田問之世事笑不言家藏黃石書一編安用李

願歸來篇我欲前峯卜數椽幅巾杖履行其閒目送歸鴻揮五絃

閒牕靜聽松風眠

四時讀書樂

翁森

山光照檻水遶廊舞雩歸詠春風香好鳥枝頭亦朋友落花水面皆文章蹉跎莫遣韶光老人生唯有讀書好讀書之樂樂何如綠

滿庭前草不除

新竹壓簾柔四圍小齋幽敞明朱曦晝長吟罷蟬鳴樹夜深燼落

螢入幃北牕高臥羲皇侶只因素稔讀書趣讀書之樂樂無窮瑤

琴一曲來薰風

昨夜庭前葉有聲籬豆花開蟋蟀鳴不覺商音滿林薄蕭然萬籟

涵虛清近牀賴有短檠在及此讀書功更倍讀書之樂樂陶陶起

弄明月霜天高

木落水盡千崖枯炯然吾亦見真吾坐對韋編燈動壁高歌夜半

霜壓廬地爐茶鼎烹活火一清足稱讀書者讀書之樂何處尋數

點梅花天地心

南宋文範卷九

南宋文範卷十目錄

詔 勅 冊文 批答 赦文

告天下詔 汪藻行

隆祐皇后

幸明州赦詔 汪藻行

宋高宗

賜范温等獎諭勅書 汪藻行

宋高宗

紹興改元詔 汪藻行

宋高宗

親征詔 沈與求行

宋高宗

幸秘書省詔 宋史

宋高宗

親征詔 宋四六選

宋高宗

賜陝西宣撫處置使張浚詔 張守行

宋高宗

誠諭監司按察州縣詔 李綱行

宋高宗

賜岳飛詔 沈與求行

宋高宗

討罪誠飭詔 蔡崇禮行

宋高宗

賜新除鎮江府建康府淮安東路宣撫使韓世忠詔 蔡崇禮

行

撫諭陝西路官吏軍民等勅書蔡崇禮行

宋高宗

孟庾除戶部尚書勅程俱行

宋高宗

移蹕至臨安府手詔程俱行

宋高宗

追廢王安石配享詔胡寅行

宋高宗

行遣章惇蔡卞詔胡寅行

宋高宗

撫諭四川軍民詔洪适行

宋孝宗

立皇太子冊文洪适行

宋孝宗

戒戢賊吏詔洪适行

宋孝宗

視師詔洪适行

宋孝宗

賜趙雄上表再辭免特授右丞相正議大夫加食邑食實封

宋孝宗

不允批答崔敦詩行

宋孝宗

賜王淮上表再辭免特授樞密使大中大夫加食邑食實封

宋孝宗

不允批答崔敦詩行

宋孝宗

資政殿大學士通議大夫范成大轉一官致仕勅樓鑰行

宋孝宗

新除御史中丞章良能辭免不允詔樓鑰行

宋孝宗

江淮制置大使邱密乞致仕不允詔樓鑰行

宋孝宗

余端禮再辭免右丞相不允批答

宋孝宗

誠諭諸將詔周南行

宋寧宗

開禧改元詔宋四六選

宋寧宗

賜資政殿大學士正議大夫知興元軍府事兼管內勸農營

宋寧宗

田使充利州路安撫使馬步軍都總管四川制置大使安

宋寧宗

丙辭免除同知樞密院事兼太子賓客日下起發赴院治

宋寧宗

事恩命不允詔真德秀行

宋寧宗

賜知樞密院事兼參知政事雷孝友再乞休不允詔真德秀行

宋寧宗

明堂赦文吳泳行

宋理宗

從祀詔

宋史

宋理宗

舉將帥詔

王應麟行

宋度宗

賜知夔州張起巖獎諭詔

王應麟行

宋度宗

責諭賈似道歸里終喪詔

王應麟行

宋恭帝

擬舉廉吏詔

王應麟

南宋文範卷十

長洲顧少卿先生鑒定

秀水莊仲方編

詔 勅 冊文 批答 赦文

告天下詔

汪藻行

隆祐后

比以敵國興師都城失守侵纏宮闕既二帝之蒙塵誣及宗祊謂
三靈之改卜眾恐中原之無統姑令舊弼以臨朝雖義形於色而
以死為辭然事迫于危而非權莫濟內以拯黔首將亡之命外以
舒鄰國見逼之威遂成九廟之安坐免一城之酷乃以衰癯之質
起於閒廢之中安置宮闈進加位號舉欽聖已行之典成靖康欲
復之心永言運數之屯坐視邦家之覆撫躬獨在流涕何從緬惟
藝祖之開基實自高穹之眷命歷年二百人不知兵傳序九君世
無失德雖舉族有北轅之釁而敷天同左祖之心乃眷賢王越居
近服已徇羣情之請俾膺祊器之歸繇康邸之舊藩嗣我朝之大
統漢家之厄十世宜光武之中興獻公之子九人惟重耳之尚在

茲爲天意夫豈人謀尙期中外之協心其定安危之至計庶臻小
惕同底不平用敷告于多方其深明於吾意

幸明州赦詔

建炎三年

汪藻行

宋高宗

禦敵者莫如自治動民者當以至誠朕自纘丕圖卽罹多故昧綏
懷之遠略遺播越之深憂雖眷我中原漢祚必期於再復而迫于
強敵商人幾至於五遷茲緣仗衛之行尤歷江山之阻老弱扶攜
于道路飢寒疲犯于風霜徒從或苦驛騷程頓不無煩費所幸天
人協相川陸無虞傲治古之時巡卽奧區而安處言念連年之紛
擾坐令率土之流離鄉閭遭焚劫之災財力困供輸之役肆夙宵
而軫慮如冰炭之交懷嗟汝何辜由吾不德故每畏天而警戒誓
專克己以焦勞欲睦鄰休戰則卑辭厚禮以請和欲省費恤民則
貶食損衣而從儉苟可坐銷于氛祲殆將無愛于髮膚然邊陲歲
駭而師徒不免于屢興餽餉日滋而征斂未遑于全復惟八世祖
宗之澤豈汝能忘顧一時社稷之憂非予獲已少俟寇攘之息首

圖蠲省之宜況昨來蒙蔽之俗成致今日凌夷之禍亟雖朕意日
求于民瘼而人情終壅於上聞主威非特于萬鈞堂下自遙于千
里既真僞有難憑之患則遐邇含無告之寃已敕輔臣相與虛懷
而聽納亦令在位各須忘勢以咨詢直言者勿遣危疑忠告者靡
拘微隱所期爾眾咸體朕懷尙慮四民興失職之嗟百姓有奪時
之怨科需苛急人心雖俟于小康狂狴繁滋邦法有稽於末減乃
用迎長之節特頒在宥之恩於戲王者宅中夫豈甘心于遠狩皇
天助順其將悔禍於交侵惟我二三之臣與夫億兆之眾亟攘外
侮協濟中興

賜范温等獎諭敕書

汪藻行

宋高宗

敕范温等省所奏契勘金兵初渡黃河温等便遁居牢山繼聞本
路投順遂集忠義乘船入海據守福島山東既下北軍于登州黃
縣萊州小高濰川昌邑密州鑿山及沿膠河兩岸深溝高壘分屯
人馬督責州縣括刷錢糧討擄鄉村拘牧牛馬老稚離散田野荒

燕民不聊生無以赴愬温等雖尋常上岸或稍綽遊騎或攻劫營寨勦殺多人誓竭忠節本軍凡遇金人接戰內有得功之人別無犒賞遂量功績逐急借補加轉官資伏望將已借補之人給付告劄補正官資事具悉朕惟強寇長驅全齊不守凡妖氛之所被如滄海之橫流汝志存忠誠恥附汗逆乃前期而避銳徑率眾以乘危隔絕朝廷荐更歲籥偶使壇之及境附奏牘以披誠志節如斯古今誰及爰峻加于爾秩仍徧錄於有功其其復于子封以卒成於汝志

紹興改元詔

汪藻行

宋高宗

聖人受命以宅中莫大邦圖之繼王者體元而居正盍新年紀之頒朕遭時艱難涉道寡昧熟視斯民之荼毒莫當強敵之侵陵負此百憂於今五載曷嘗未明求治當饋思賢念兩宮之遠而菲陋是安恐九廟之顛而艱危是蹈倘禍可弭雖勞弗辭然生靈久困於干戈城郭悉殘于煨燼丁壯繫身於異域旄倪暴骨於中原

田桑失時男女墮業僅存常產者苦斗舂之斂乍失故鄉者無尺土之依或逼飢寒散爲賊盜始於莫之加恤終而無以自還致汝於斯皆予之過幸高穹之未厭哀否運之已窮戎馬雖來邊防粗備嘉與照臨之內共圖休息之期紹奕世之閔休興百年之丕緒爰因正歲肇易嘉名發渙號於治朝霽解恩於寰海其建炎五年可改爲紹興元年

親征詔

沈與求行

宋高宗

朕猥以寡昧屬茲艱虞迫臣民愛戴之誠續正統於將墜痛父兄播遷之苦履尊位以何安夙夜以圖策慮並用豈不能躬擐甲胄親冒煙塵乘將士欲戰之心慰黎元厭亂之意然以兩宮萬里一別九年親迎鑾輅之還期遂庭闈之奉故暴虎馮河之怒敵雖逞於兇殘而投鼠忌器之嫌朕寧甘于屈辱是以卑辭厚幣遣使通和庶殫孝弟之思必徇哀恫之請至于土地梗絕生齒流離師徒懷暴露之憂閭里起驛騷之歎繇朕不德嗟彼何辜仰懷故國之

廟祧至于霄涕俯見中原之父老寧不汗顏比得疆敵之情稍有
休兵之議而叛臣劉豫懼禍及身造爲事端間諜和好信逆難之
狂悖率羣偷而陸梁借彼援師倚爲威勢發我赤子脅使征行涉
地稱兵操戈犯順大逆不道一至於斯警奏旣聞神人共憤猛士
在列怒髮上衝以謂逆順之理旣分勝負之形可見皆願挺身而
效死不忍與賊而俱生朕乃下詔總師卜日引道前驅方戒積霧
頓開天地鬼神罔不助順將帥輔弼罔不協心今朕此行士氣百
倍雖在纂承之後每乖舉措之方尙念祖宗在天之靈共刷國家
累歲之恥殪彼逆黨成此僑功載惟風霜跋履之勤仍蹈鋒鏑戰
爭之苦興言及此無所措躬然而能建非常之功必有不次之賞
初詔具在朕不食言

幸秘書省詔

紹興十四年

宋高宗

蓋聞周建外史掌三皇五帝之書漢選諸儒定九流七略之奏文
德之盛後世推焉仰惟祖宗建國冊府凡累朝名世之士由是以
興而一代致治之原蓋出於此朕嘉與學士大夫共宏斯道迺一
新史觀新御榜題肆從望幸之忱以示右文之意嗚呼士習爲空
言而不爲有用之學久矣爾其勉修術業益勵猷爲一德一心以
共赴亨嘉之會用丕承我祖宗之大訓顧不善歟

親征詔

紹興

宋高宗

朕履運中微遭家多難八陵廢祀可勝懷土之悲二帝蒙塵莫贖
終天之痛皇族尙淪於沙漠神京猶汙於腥羶銜恨何窮待時而
動未免屈身而事小庶期通好以弭兵屬戎虜之無厭曾信盟之
弗顧怙其篡奪之惡濟以貪殘之兇流毒徧于華夷視民幾于草
芥赤地千里謂殘暴而無傷蒼天九重以高明爲可侮頃因賀使
公肆嫚言指求將相之臣坐索淮漢之壤吠堯之犬謂秦無人朕
姑務於含容彼尙飾其奸詐嘯厥醜類驅吾善良妖氛浸及于中
原烽火遂交於近甸皆朕威不足以震疊德不足以綏懷負爾萬
邦於今三紀撫心自悼流涕無從方將躬縞素以啟行率貔貅而

薄伐取細柳勞軍之制考澶淵卻敵之規詔旨未頒歡聲四起歲
星臨於吳分冀成淝水之勳鬪士倍於晉師當決韓原之勝尚賴
股肱爪牙之士文武大小之臣戮力一心捐軀報國共雪侵凌之
恥各肩恢復之圖播告遐邇明知朕意

賜陝西宣撫處置使張浚詔

張守行

宋高宗

金人去冬兩路深入南蹂洪撫以至筠袁東陷昇杭以及明越朕
以宗社至重父兄未還遠避敵鋒圖保基緒而我將士懷積年憤
鬱之志乘驕敵勞敵之師各輸厥忠人自爲怒張俊迎戰于鄞水
劉光世邀擊于江西周望以大軍控禦于嘉禾趙立擁義旅驅攘
於淮甸捷書日報俘馘踵來敵人挫傷前所未有爰念旣得地利
之險以保江浙兼亦因天時之便以規河山惟卿忠翊朕躬勳在
王室宣風邊徼備著勤勞宜屬壯猷共恢遠略蓋聞敵人用兵深
忌暑月要卽騎卒解甲弛鞍之際稍資秦兵投石超距之餘于五
月閒徑搗巢窟一由同州渡渭以取蒲解一由鄜延界渡河以取

晉隰俯從戰勝百倍之氣仰符前王六月之征用我計之未嘗出
敵人之不意竊謂一舉可圖萬全卿宜審度事機益幾籌慮勉卒
賢業無規近功庶幾盡復兩河迎還二聖以底中興之烈豈不偉
歟

誠諭監司按察州縣詔

李綱行

宋高宗

朕祗紹丕基撫有方夏勵精求治興事就功皆以利安元元爲本
深懼州縣之吏不能承流宣化達于吾民建置監司分道按察或
總漕計或司祥刑或掌常平之政或專學校之法職雖不同而所
以按察州縣其任一也方其出使朕親御便殿以臨遣之及其還
歸復使進對以盡諮謀度詢之義視遇之禮亦已重矣庶幾德意
志慮得以下達而吏之臧否民之利病不壅于上聞內自畿甸外
薄嶺海萬里之遠風流而令行德洋而恩普吏稱其職民安其業
以底太平之盛而監司未有卓然修舉職事稱朕意者其故何耶
今州縣之閒貪吏倚勢以侵漁姦吏舞文而巧詆無宿道向方之

志有背公營私之心法完令具布在方冊而吏惰弗虔荒失詔命使元元之民不被其澤良法美意殆爲虛文而監司曾莫之恤惟以簿書期會爲急務蔑視寒士摺撫細故以塞責而彊禦權勢之吏賊汗貪藉恬不誰何夫監司朕所以寄耳目之任也失職若此朕何望焉其自今以往各揚厥職按察所部凡姦貪惰慢之吏曠職失守違法害民徇流俗而無享上之心者悉以名聞當議竄黜以爲羣吏之戒其或附下庇奸畏避不舉得於訪聞罪不汝貸故茲詔諭想宜知悉

賜岳飛詔 沈與求行

宋高宗

比得張浚奏知湖湘之寇悉已肅清紓朕顧憂良用欣愜非卿威名冠世忠略濟時先聲所臨人自信服則何以平積年嘯聚之黨于旬期指顧之間不煩誅夷坐獲嘉靖使朕恩威兼暢厥功茂焉腹心之患旣除進取之圖可議緬思規畫嘉歎不忘然恐招撫之初人懷反側更宜緩輯以安眾情措置得宜彼自馴擾必與卿計

之熟矣或有陳請可具奏來

討罪誠飭詔 綦崇禮行

宋高宗

門下朕臨朝不怡視古太息爲民父母未免兵革之憂俾我黎元重罹盜賊之患蠢茲閩越之眾竊弄潢池之兵頻年內侵百姓俶擾朕念方隅之弗率悼赤子之無辜申命爾臣肅將師律戎車旣飭元惡自焚嶺海底平民夷綏服乃眷傷殘之壤備聞愁歎之聲誅求繁多徧於百室力役勞苦甚於三時雖蠶螭已除震於方外之寇而瘡痍未起愧此瘠土之民豈無曠恩用錫爾祉其開舊染之俗一洗庶戮之愆於戲討罪示威雖爾有辭於罰好生惡殺推朕不忍之心

賜新除鎮江府建康府淮安東路宣撫使韓世忠詔 紹興

宋高宗

朕惟時已戒寒守當嚴備循江流而截險顧力散以難周聯形勝以宿師則勢專而易應眷昇潤東西之府據江淮南北之衝走集

所趨舳艫交會封疆之接雞犬相聞曾無數舍之遙奚假兩軍之重乃命江東之戍更莅池陽遂因京口之屯並臨建業仍資威望分控長淮惟卿勇不顧身忠無擇事寬其分部庶能展足以赴功睦乃比隣尙克同心而濟務念國家之至計繫將相之協恭勉就大勳毋懷小忿譬猶捕鹿要爲犄角之圖有若獻豸皆獲公私之利往體朕意佇觀厥成

撫諭陝西路官吏軍民等勅書

紹興

某崇禮行

宋高宗

勅陝西路官吏軍民等朕躬履多艱力興大業勤兵吳會以北控于江淮分帥秦川俾西臨于關塞庶將復國用克息民嗟謀畫之未良致師徒之不競委金湯而弗守半已隳殘總強敵之無厭恣其吞噬靡顧黎元之禍但資僭竊之臣淪陷者無路以自歸散亡者有生而皆棄流毒爾眾痛切朕心是用更命近臣往護諸將旣撫循於凋瘵且備禦於侵陵毋逞淫刑務行寬政庶反側者罔迷

于首鼠而逋逃者還齒于吾人共圖勘定之期終底和平之舊體斯至意肩爾一心故茲撫諭想宜知悉冬寒爾等各比好否遣書指不多及

孟庾除戶部尚書勅

程俱行

宋高宗

勅周官以司徒制天下之地征而均節財用者冢宰宋興以執政領天下之漕計而調度出納者三司由茲以來代有因革今則成周之法祖宗之制凡宰輔攸司之守舉而歸之戶部矣然則爲之長者顧不重哉具官學不泥古才足濟時憂國首公見于華皓高密之政有循理之稱睢陽之守有扞城之節朕付以邦計擢之貳卿足兵食於垂罄之餘備典禮于時邁之際事不愆素官無乏其是用冠以納言陟之常伯豈徒益官於來效抑以昭勸于赴功然方今民力已窮軍旅之事未息節以制度當務所先非予率之以樸儉無以化谿壑之侈心非爾去敝于因循無以抒黔黎之深瘵唯民不加斂而國用足則予汝嘉可

移蹕至臨安府手詔

程俱行

宋高宗

朕自承大統於今五遷豈唯紹復是圖抑亦黔黎是念然不常寧處軍旅薦興百姓之窮失職者滋眾朕不明于理雖瘡身苦志而安輯之效未云獲也若疾痛在己未嘗有忘焉蓋人心無聊而欲陰陽調和菑害不作難矣今者駐蹕吳會以須天時豈無輪轉之勞與夫土木之役至于供億之須亟下征調之目實繁師徒所過芻牧不禁殘略之後荆棘未除倘又俾無良之人貪賊之吏攘臂搖毒其閒斯亦甚矣夫邦本之固而戡定是求非所聞也且徒善不足以爲政徒法不足以自行苟恤之以言而害之以政導之以政而敗之以人則朕獨能無愧乎有司其條具所以便民省事戢姦去敝之實以聞

追廢王安石配享詔

胡寅行

宋高宗

仰惟神祖英睿之資勵精圖治將以阜安宇內威服四夷甚盛德也王安石首被眷求進秉國政所當致君堯舜措俗成康以副委

屬之重而乃文飾奸說附會聖經名師帝王實慕非軼以聚斂爲仁術以法律爲德政排擯故老汲引儉人變亂舊常戕毀根本高言大論詆訾名節歷事五代者謂之知道劇秦美新者謂之合變逮其流弊之極賢人伏處天地閉塞夷狄猾夏率獸食人三綱五常浸以湮滅而習俗既久猶未以爲安石之罪朕甚憾焉昔者世衰道微暴行有作孔子撥亂反正寓王法于春秋以俟後世朕臨政願治表章斯文將以正人心息邪說使不淪胥于夷狄荆舒禍本可不懲乎安石廢絕春秋實與亂賊造始今其父子從祀孔廟禮文失軼當議黜之夫安石之學不息則孔子之道不著子大夫體朕至意倡率於下塞源拔本無俾世迷庶幾于抑水膺戎驅猛距詖崇天子之事爲聖人之徒則予一人有辭於永世亦惟子大夫之休烈尙明聽之哉

行遣章惇蔡卞詔

胡寅行

宋高宗

朕比覽元符諫臣任伯雨章疏論列章惇蔡卞詆誣宣仁聖烈太

后欲追廢為庶人誰無母慈何忍至此賴哲宗皇帝聖明灼見不從所請使其言施用豈不蔑太后九年保佑之功累泰陵終身仁孝之德自朕纂服是用疚心昭雪黨人刊正國史雖崇寧而後迷國猥眾推原本始實自紹聖惇卞竊位之時而諛慝未彰公論猶鬱將何以仰慰在天稱朕尊嚴宗廟之意哉可令三省取索見存干照文字議罪來上當正典刑布告天下為萬世臣子之戒

撫諭四川軍民詔

隆興

洪适行

宋孝宗

朕嗣守神器於斯三年迺瞻坤維邈在萬里會邊塵之不靖致戎備之未除乘塞護關久矣采薇之戍踰山越谷遠哉輸粟之勞或郡邑不值於循良故田里尚生於愁歎茲選近臣之彥往專外闕之權挾纊以慰軍情下當戶曉褰帷以求民瘼大則驛聞推吾軫恤之恩助以便宜之制必令四境之按堵惟恐一夫之鄉隅倘休息之有期庶榮懷而相慶

立皇太子冊文

乾道元年

洪适行

宋孝宗

維乾道元年歲次乙酉正月朔日皇帝若曰在昔帝王稽夏商家天下春秋之法立嫡以長主器繼明蓋取諸震離所以尊宗廟重社稷也咨爾皇子少保永興軍節度使鄧王食邑二千戶食實封八百戶愔生有異表序居上嗣敦厚温文金昭玉裕問寢侍膳則盡綵衣之孝親師就傅則樂聖人之道令德逐日以新英聲隨風而流元良正本久矣兪望朕服堯之後兢兢四載仰奉慈訓肇闢春闈協華復旦日宣重光懿哉鑠乎有國有家之慶也是用撰嘉辰御路朝盛儀備物迎休於乾以冊命爾為皇太子於戲悉爾心修爾身勿蹈非彝勿邇邪佞惟誠可以格物惟仁可以濟眾正言正道聞斯行之敬之哉用永我祖宗之不命

戒戢賊吏詔

洪适行

宋孝宗

朕聞先王之時人有士君子之行在位者皆節儉廉清冰霜其操羔羊素絲之詩所為作也今則不然貪夫徇利廉恥道喪亶以廣田宅厚妻子為計谿壑無厭漫不忌憚甚者掩公帑之積私倉庾

之羸賊民剝下股其膏血嗚呼豈設官之意哉朕自臨御以來崇儉德蠲浮費庶幾嘑風厲天下姦賊之吏未有聞而不泊然速辜相繼何耶是朕德不能化罰不能懼也古者刑不上大夫唐虞畫衣冠而民不犯孰謂搢紳之士心無媿恥不若古之齊民歟夫先甲後庚申飭教告而抵冒不已至於用法豈得已哉凡我諸臣其洒心遷善勵淳白之節副綜核之政以長保其祿位無或不悛奸我重辟播告中外使明知朕意

視師詔 乾道 洪适行

宋孝宗

朕以南北生靈久苦兵革會敵帥有通和之議不憚屈己委曲如約既得四郡尙復邀求書札方來兵鋒已接朕識不能料事誠不能格物志在尋盟反墮其計使我士卒暴露民庶流離蚤夜痛心噬臍何及已稽典故改卜南郊將臨江淮親御戎輅師有曲直蓋不得已凡我文武軍民懷十聖二百年涵養之恩憤中原四十載分裂之難奮忠出力勿負國家大可以取富貴而求功名次可以

寧父母而保妻子皇天后土實鑒此言已令有司擇日進發所過務從節省並不得有所騷擾布告邇遐使知朕意

賜趙雄上表再辭免特授右丞相正議大夫加食邑食實封

不允批答

崔敦詩行

宋孝宗

朕惟宰相之任厥惟難才非盡古之道不足以有謀非達今之宜不足以有立固嘗中夜以興當食而歎思得一世之人傑足以濟時成務者俾任吾事天若興世國豈無才卿蚤由禁途自結朕眷以陳平之智而復重厚可任以元齡之謀而能果斷必行朕所注意非一日也渙號已頒眾言維允功業之盛四面以觀區區謙辭終不得徇

賜王淮上表再辭免特授樞密使大中大夫加食邑食實封

不允批答

崔敦詩行

宋孝宗

朕惟帝王之盛未嘗去兵是以爰自卽位蚤夜以思啟處以圖其於三軍五兵之事不敢一日忘也乃若廊廟輔臣股肱同體實賴

講謀究度以旦夕承翼濟予於不庸卿毗佐累年練達庶事鎮物以重事上以誠具鼎才之實而養以剛中積坤德之純而發以方大朕所嘉賴匪卿而誰專付重權益懋成績萬微之會悉以屬卿宜宏大猷毋事小節

資政殿大學士通議大夫范成大轉一官致仕敕

宋孝宗

敕圖舊人而其政方媿未能引大體以乞身胡為有請嗟名臣之老矣撫往事以慨然具官某俊逸不羣風流自命文章甚偉崔蔡誠不足多制誥尤工王楊當為之伯緒餘所出施設具宜桂海冰天望皇靈而益遠瀛壖蜀道專制閩以增雄是誠宣力于四方宜俾進官于兩地出司留籥遂奉祠庭用之未盡其才退而自求其志臥公幹漳濱之疾掛隱居神武之冠寵數彌光典刑斯在噫胸中之有兵甲世稱小范之才高扁舟之泛江湖或謂鳴夷之仙去皆爾鄉閭之舊豈其苗裔之餘無忝前良以全晚節

新除御史中丞章良能辭免不允詔

樓鑰行

宋孝宗

朕惟振朝廷之紀綱當先重紀綱之地新天下之耳目必遴求耳目之官卿鯁亮之資淵深之學自奮於韋布之日有聞於搢紳之儒雖遍歷於清華亦屢更於夷險處身無玷疾惡如風欲堅塞于倖門曾不辭於怨府彈擊之任簡求實宜其力辨於官邪以其扶于國論發卿所蘊助朕有為勿騰避寵之章益勵敢言之氣

江淮制置大使邱密乞致仕不允詔

樓鑰行

宋孝宗

朕惟屯禁兵百萬而邊鄙是虞開幕府四三而留都尤急昇以樞廷之寄增吾天塹之雄卿久安里閭存分帥閩徒得君重肯為朕行上寬宵旰之憂外撫貔貅之眾盡護諸將獨當北門草木亦知其威名狄鞬想聞乎風采力裨廟論卒靖封陲人皆望歸袞之期卿乃有掛冠之請矧方叔之謀猷克壯而晉公之神明不衰益堅體國之心毋作明農之計

余端禮再辭免右丞相不允批答

宋孝宗

省表具知君臣相逢謂之千載上下協濟本乎一心必能如風雲之從斯可不膠漆而固惟卿樸厚副朕倚毗雖累年務罄于論思而近歲又殫于忠力眷政府樞廷之更踐知文事武備之該通儀圖老成宜置左右試之已久斷然不疑惟昔宗盟嘗居家宰之任若時卿衰亦應柘溪之祥尙期遠邁于前人相與共興於大業朕所望者卿何辭焉

戒諭諸將詔 周南行

宋寧宗

朕惟敵據中原今踰六紀戴天履地其忍忘靖康未雪之讐嘗瞻臥薪常恐負烈祖有爲之託惟是寢兵之已久深知動眾之匪輕屬聞金運之將衰加以渠豪之內擾河南亢旱赤地無餘漢北連兵暴骨相屬遺黎轉徙襁負來歸爰念淪溺之民至於相率而請命故下綏懷之詔實非得已而興戎朕既不能遏邊釁於未開之時未免列將屯而爲不虞之備惟今疆場之多事正須將士之同心若平時情意之未孚則緩急犄角之何望咨爾三軍之統帥暨

于列校之偏裨如廉藺之共濟艱難若李郭之相勉忠義各殫勇略以赴功名或迎敵以前行或邀擊于後阨或附聯其疏罅或應援其往來務令聲勢之相依有如心手之相應并謀合力功必有成高爵厚祿朕所不吝

開禧改元詔 嘉泰

宋寧宗

大易論變則通通則久莫如去故以取新春秋謂正次王王次春尤重表年而首事朕猥慙涼德嗣守丕基無怠無荒每躬親於庶政何修何飭可坐致於隆平賴宗社之翊扶荷穹祇之貺施年穀層書于中熟邊垂犂弭于外虞汔可小康未知彼濟宵旰焦勞而治功愈邈夙夜寅畏而和氣未臻至于中大之區間有鬱憂之變士鮮公忠經遠之操人懷媮惰白營之私聞見習熟謂爲當然風俗流失怙而不悛思欲洗凡而破陋宜先滌穢以盪瑕矧庚申受命以至今踰二百載自甲子循環而復始又六十年茲迂續於方來期增光於既往爰因嗣歲載易美名法開寶肇造之初泊天禧

全盛之日庶幾二祖之烈永底烝民之生既大號之渙孚宜洪恩之解作

賜資政殿大學士正議大夫知興元軍府事兼管內勸農營田使充利州路安撫使馬步軍都總管四川制置大使安丙辭免除同知樞密院事兼太子賓客日下起發赴院治事恩命不允詔真德秀行

宋寧宗

勅具悉昔在阜陵之盛緬懷蜀道之難選任惟精率取一時之傑功庸既懋必躋兩地之嚴仰窺宏模厥有深旨卿以魁磊之器雄剛之材忠義貫乎神明威名震乎戎落百年彝鼎丕昭曠世之勳萬里岷峨坐復承平之觀念宣勞之浸久豈圖任之可忘渴聞話言想見風采肆擢陪于右府併參護于春宮顧南渡中興以來餘八十載若西州與政之彥凡六七人皆嘗服采于朝始拜登庸之寵維卿殊遇眎昔尠儔宜追聞命引道之風庸副側席待賢之意所辭宜不允

賜知樞密院事兼參知政事雷孝友再乞休不允詔嘉定

真德秀行

宋寧宗

朕內修經國之謨外講安邊之畫念端委廟堂而共政惟二三臣苟折衝樽俎之有人賢十萬眾卿以瑰磊之器雄剛之材正色立朝真後彫之松柏同心輔政有相濟之鹽梅當夙宵圖父之秋正上下交修之日眷時邇列稀若晨星獨我老成屹如砥柱俾朕躬之有賴諒天意之使然與其志在邱園冀私情之適孰若心存社稷合大義之公往佩子言勉綏爾位

明堂赦文 吳泳行

宋理宗

朕嗣宅丕后保綏受民上帝臨女無貳爾心敢不盡靈承之事先王惟時懋敬厥德未嘗忘禩享之忱每夙夜以惟勤庶天神之克與顧德不類遭時多艱兵氛未澄星紀弗靜京圻邦之根本而淫雨害于粢盛漢峴國之咽喉而蝨賊搖我邊鄙戰士被介冑不得臥丁夫罷轉餉不得休瘼茲下民靡所寧宇念天地以好生爲德

百宋文苑卷一
三才之奧亡哀矜庶獄之心蓋嘗以干戈省厥躬以禮象救厥政
雖承宇之霏開霽未還時和歲稔之風雖侵疆之騎倏回寧保地
靜冰寒之日若匪顛蒼旻而潔告其何措方夏于阜安爰刺六經
之文更規五室之制有秩禮固有嚴頌堂奉牲以告不在牲而在
民力之普存更幣以祈不惟幣而惟國用之均節憑至誠之洞屬
薦明德之馨香於是登彝闕宮奠璧清廟夙駕齋輅親祠總章袞
龍作繪而五采施銷玉鳴詩而九歌應多士顯相陟降在庭百工
併從左右厥辟瞻和氣之薰淡儼神光之陸離豈惟鐘摐煌煌鏘
鏘如見旂容容騎沓沓蓋上天日監王者之處曾咫尺之不違而
庶民是近天子之光宜始終之若保既荷靈娛之來燕豈應餽惠
之不均迺御端闈式頒大號嘉與函生之眾共迎景貺之新於戲
崇周官九尺之筵精意已通于肸蠁肆呂命五刑之赦湛恩斯徧
于堦堦尚賴奮庸亮采之臣乘德陪祠之彥烈文羣辟孔武六師

永肩勵翼之忠宏濟不平之業

從祀詔

清祐元年

宋理宗

朕惟孔子之道自孟軻後不得其傳至我朝周敦頤張載程顥程
頤真見實踐深探聖域千載絕學始有指歸中興以來又得朱熹
精思明辨表裏渾融使大學論孟中庸之書本末洞徹孔子之道
益以大明於世朕每觀五臣論註啟沃良多今視學有日其令學
官列諸從祀以示崇獎之意

舉將帥詔

王應麟行

宋度宗

勅門下朕鑑徹桑未雨之戒軫采薇治外之憂熊羆父王家昔何
多于英傑蛇豕食上國今未救于曷乘風寒數處以護吳道敵多
方而誤楚荆益慮深于唇齒湘廣備缺于腹心雖錫斧鉞而啟元
戎猶聽鼓鞶而思猛士食靡忘於鉅鹿志孰奮于伊吾內無舉奉
世之臣外乏代崇文之將朕爲拊髀戎將生心昔高廟歲舉六科
智勇是選孝祖薦格五等謀略爲先率由舊章深詔執事詩書如

御穀預思元帥之儲策慮若陳湯勿求稽行之備搜異能于數澤拔奇節于偏裨爪牙官備不虞克成固圉之績履屐聞得其任无媿知人之明惟爾之能求朕攸濟故茲詔示想宜知悉

賜知夔州張起巖獎諭詔

王應麟行

宋度宗

勅起巖朕惟聖人有金城所恃者節義之士惟德不明奸臣誤國分閫守圉之臣接踵降長江失險延及上流每歎國家三百餘年仁厚涵育豈惟一顏平原者自荆峽不守蜀道未通將士勤備禦而不得撫勞黎元苦兵革而不得拯救乃瞻西顧宵旰勿遑湖南帥臣芾以卿所奏帛書來上知卿忠忱義槩堅守夔門誓與軍民赤心圖報中流砥柱疾風勁草于卿見之方以久不聞蜀事爲急卿獨聞關險阻馳奏於危急之衝有臣如此國勢增重彼負國賣降者真可媿死卿又糾率義旅剋復開州斬使焚書誓以滅賊爲期朕嘉歎不已趣命授卿正任承宣使領廂部之師以示褒賞天助者順師出有名醜虜逆天平殄有期朕已去奸進賢改紀其

政中外人心踴躍思奮卿其獎率軍民益嚴戰守如昔璘玠之保蜀敵愾獻功朕于節鉞無所吝卿之忠義旂常竹帛有光焉故茲獎諭

責諭賈似道歸里終喪詔

德祐元年五月四日

宋恭帝

勅似道吾聞忠孝臣子之大節命義天下之大戒卿受國家之殊遇居將相之重任邇者督師勿績蹙國憤軍人言沸騰欲正其罰吾與嗣君念卿服勞王朝務存體貌俾歸里終喪用彰孝治吾于待大臣之禮至矣聞卿安處維揚未卽就道公議全涌皆謂臧孫紇如防春秋大義凜如霜日君令臣從焉可違也吾惟卿素以忠孝自負必不固違吾命以虧事君事親之道凡羣臣所奏姑惟置之今歸涂未阻可以退修初服盡禮倚廬而猶復翱翔淮壖忠孝胥失進退無據大臣出處當如是乎茲命李庭芝宣吾與嗣君忠厚之旨卿其亟歸喪次以盡臣子之道以弭公議之責固當曲示

保全否則眾論益甚名教靡容吾雖欲屈法伸恩而不可得卿尙
明聽吾言善始以終亦有辭于永世故茲詔示

擬舉廉吏詔

王應麟

勅門下周聽治以六計廉善居先漢辟士以四科清白爲首朕灼
知有俊誕保受民惟前代迪厥官不肩好貨凡正人羞其行庶幾
成風嘗賜札以律貪復作銘而申訓曾是在位猶從匪彝鞭鞮不
已而寵賂章簠簋不飭而節行缺退食鮮羔羊之節虐民多碩鼠
之譏念激濁在于揚清而瘴惡莫如彰善神爵獎朱邑之潔治盛
循良開元旌王邱之廉風移苛憊一賢蒙擢百辟鄉方肆公道之
天開閔頽波之瀾倒克正罔敢勿正既昭德以塞違進良以率不
良與厲精而更始咨爾承休之彥體予美俗之懷廉欲得其眞公
選潔修之士舉皆賢于己博詢操履之原內則如光祿之薦王嘉
外則如河東之察黃霸人之有猷有守具以實言予其懋賞懋官
亦克用勸故茲詔示想宜知悉

南宋文範卷十

南宋文範卷十一目錄

制誥 檄

李綱除尚書左僕射兼門下侍郎御營使制

宋高宗

吳執中追復述古殿學士制

許景衡行

宋高宗

孫覲除戶部尚書制

張守行

宋高宗

程瑀除兵部侍郎兼侍讀制

張擴行

宋高宗

節度使開府儀同三司除尚書左僕射兼中書侍郎制

翟汝文行

宋高宗

董震轉武節大夫遙郡刺史制

張綱行

宋高宗

周綱姜師仲除監察御史制

張綱行

宋高宗

徐俯除端明殿學士宮祠制

張綱行

宋高宗

范致虛知鼎州制

李正民行

宋高宗

鄒浩可特與追復龍圖閣待制制

蔡崇禮行

宋高宗

朝奉大夫試御史中丞趙鼎可除吏部尚書制

蔡崇禮行

宋高宗

除呂頤浩特授依前尚書左僕射同中書門下平章事兼知

樞密院事都督江淮兩浙荆湖諸軍事加食邑食實封制

其崇禮行

起復徽猷閣直學士朝議大夫利州路經略安撫使知興元

府事王庶轉行兩官制 王洋行

楊時贈四官制 胡寅行

除李顯忠特授威武軍節度使充左金吾衛上將軍食實封

如故制 汪應辰行

岳飛追復原官改葬錄用其後制 周必大行

趙汝愚罷右丞相制 鄭樞行

秦檜降爵易諡制 周南行

太師鄂王岳飛改諡忠穆制 程瑛行

參知政事曾從龍除知樞密院事加食邑實封仍兼知參知

政事制 洪咨夔行

洪咨夔授試中書舍人制 吳泳行

特進左丞相兼樞密使鄭清之特授觀文殿大學士醴泉觀

使兼侍讀制 許應龍行

陳韓除工部尚書依舊沿江制置制 袁甫行

文天祥特授端明殿學士依舊江西安撫使浙西江東制置

使兼知平江府誥 王應麟行

文天祥授右丞相兼樞密使都督諸路軍馬制

奉詔移偽齊檄

岳飛

任大事以爾為棟梁使斷大疑以汝為龜筮是用延登上相秉幹
鴻鈞特尊左揆之崇兼貳東臺之峻仍具公爵陟以文階增衍爰
田陪之旨賦游盼殊渥昭示顯榮於戲得賢邦家之基汝能追配
於前哲論相人主之職朕則無媿於古人益遠乃猷以對朕命

吳執中追復述古殿學士制

許景衡行

宋高宗

勅示好惡以正風俗錄往善以勸來者此為政之大方而今日之
先務也具官某有通變之才有特立之操博聞精識洞達當世之
務忠言讜論不撓羣枉之間受之先皇再執邦憲排擊奸慝杜絕
濫恩謂內侍擅權將有意外之憂而新邊置郡徒耗海內之力至
於花石之糜費後苑之淫巧慨然指陳多見開納雖清議所共與
要直道之弗容乃從左遷未幾淪謝精忠凜然不泯當宁久而益
思肆朕臨御屬茲艱難覽明哲之建言若著龜之先兆是謂三代
之遺直獨歎九原之不作宜覃渥澤追復祕殿英爽不昧服此恩
榮亦使有志之士知朝廷之於賢者猶不忘于泉壤也可

孫覲除戶部尚書制

紹興

張守行

宋高宗

朕獲承至尊適際艱運郡邑殘破而賦入滋削邊郵倣擾而費出
無窮將因陋就寡而不為遠圖則有國不足之憂將仰取俯拾而
不遺餘力則有民不堪之患欲付是柄實難其人具官某學問醇
深言奇而適于用智慮英敏遭變而知其權才無不宜用然後見
當乘輿一旦南渡之後而行闕百須並起之時斡旋盈虛指顧辦
給效見已試亟陞八座之崇國恃以強貯富九年之積周冢宰制
國用蓋垂量入為出之規唐宰相兼度支乃貽剝下媚上之誚其
體慈儉之意益圖均節之方爾所優為寧俟多訓

程瑀除兵部侍郎兼侍讀制

張擴行

宋高宗

勅文昌貳卿莫高於武部金華勸讀式重於儒臣我有老成克膺
是選具官某器識渾厚執節剛方行兼忠孝之純學探聖賢之奧
繩愆諫省早惟補袞之功平奏東臺夙藹回天之譽踐場滋久望
實益孚比走召於遠方亟對揚於便殿十年去國恍驚華髮之多

一節事君終念赤心之在往祇舊服益勵乃猷渴聞啟沃之言佇爾清閑之燕

節度使開府儀同三司除尚書左僕射兼中書侍郎制翟汝文行

宋高宗

古我先王惟圖任舊人共政咸有一德克左右厥辟宅師格于皇天迪我高后嗟爾萬方之有眾聽予一人之作猷具官某為國世臣若時元老有申伯柔惠之德揉此萬邦有山甫將明之忠式是百辟勳在盟府紀于太常淑旂綏章壯十乘元戎之寄繡裳赤舄兼三事大夫之儀疇論道經邦之遠猷對代天理物之元宰眷茲屏翰作朕股肱邁命袞衣之歸爰趨介圭之覲賚予良弼惟簡在上帝之心建爾上公以欽若先王之烈具瞻四海師表萬民其正左輔之名往總西臺之務朕欲四方其訓無競惟人汝惟庶績咸熙允釐在位命乃保乂格于丕平使山川草木亦莫不靈致華夏蠻貊罔不率俾於戲欲治已久得時為難由成湯而至文王若伊

尹萊朱之親見乃齊宣之知孟氏曾管仲晏子之不為往肩乃心以輔台德

董震轉武節大夫遙郡刺史制張綱行

宋高宗

朕惟康濟艱難勤勞夙夜思得竭忠奮義之士付以折衝禦侮之權因示褒優庶圖恢復爾威名夙著智略有餘迺心不負于朝廷自率來歸之路抗志欲平于寇難更多斬獲之功眷予方念于中原倚重孰先于西土欲擇維藩之寄宜推敵愾之臣地合三州勢當一面用啟爾宇爰俾鎮臨克壯軍容坐期綏靖名郡遙分于刺舉武階兼進于崇資爾其祇服恩榮益思報稱佇俟平戎之奏尙增破虜之封

周綱姜師仲除監察御史制張綱行

宋高宗

士有卓然以氣節自立于世然後能有所為矧吾中執法之屬任國風憲以督察百吏為職則為官擇人非有立者不在茲選爾綱嘗任言責閱試已孚爾師仲行已直方見稱多士茲用並擢御史

以舉六察之政考之公論匪為爾私往服訓言益堅所守

徐俯除端明殿學士宮祠制 張綱行 宋高宗

憂勤圖治時方急于任賢左右近臣義豈容于去國念有均榮之請欲高易退之風宜徇懇祈更全體貌具官某氣節不撓辨論可觀蔚有譽于當時期力行于素志起從疏遠亟聯從橐之華度越輩流遂陟樞庭之峻閱時未久被遇非常庶觀整軍經武之謀折遐衝于萬里抑賴同寅協恭之助圖大政于一堂顧屬任之方深曾設施之未究奏章俄上引疾甚堅肆推從欲之仁曲示優賢之禮殊庭厚祿秘殿隆名匪曰朕私用榮爾去或出或處諒不替于憂時嘉謀嘉猷尚毋忘于告后

范致虛知鼎州制 李正民行 宋高宗

勅朕惟式遏寇虐康濟艱難當饋興嗟豈必借賢于異代若占有訓亦惟圖任於舊人眷茲師帥重權宜畀廟堂夙望爾智博而材瞻文麗而學優守節不渝嘗聞汲黯之好直因時或異遂見徐公

之有常協贊機衡斯謀必告薦臨方面靡勞弗宣茲趣召于遐陬俾來朝于行在德與年而彌劭志雖窮而益堅還秘殿之華資以彰體貌領殊廷之館御庸便咨詢迺慷慨以有陳願馳驅而自效惟荆楚之輿壤實夷獠之與鄰方賴老成重煩鎮撫杜詩在外乃心不忘乎朝廷申伯于蕃王室允資其屏翰往祇朕命尚遠乃猷可

鄒浩可特與追復龍圖閣待制制 紹興 宋高宗

勅朕履茲艱運迹彼亂源傷諂佞之成風悼忠良之獲罪肆褒遺直用勸在官故具官某處心不欺養氣至大言期悟主引裾嘗犯於雷霆計不惜身去國再遷于嶺徼具臣動色志士傾心英爽不忘想生氣之猶在姦諛已死知朽骨之尚寒其還延閣之清資少慰重泉之幽憤噫為善之效其報也長身雖抑于生前志卒伸於地下尚其胥饗歆此寵光可

朝奉大夫試御史中丞趙鼎可除吏部尚書制

禮行

紹興 宋高宗

蔡崇

勅周官冢宰任首六卿漢制尚書位參八座維職典銓衡之要而班隣丞輔之崇在昔既然于今斯重久虛厥次茲得其人具官某和裕而靖莊直方而敦大立朝正色折衝允賴于精神遇事敢言發憤每披其肝膽赤墀頻對白簡屢聞載嘉烏府之勞進陟鑾坡之峻抗章引避陳義甚高察其操守之堅雖力辭于翰苑亮爾公忠之素可輕去於朝廷其升常伯之聯往率天官之屬顧干戈擾攘衣冠多失職之嗟而典籍散亡胥吏有用權之患尚藉通明之鑒克諧平允之稱往既乃心無忝朕命可

除呂頤浩特授依前尚書左僕射同中書門下平章事兼知

樞密院事都督江淮兩浙荆湖諸軍事加食邑食實封制

紹興

蔡崇禮行

宋高宗

門下承天子而裁萬化入則斷國論於一堂位冢宰而總六師出

則折遐衝於諸夏欲並著安危之兩意顧莫先文武之兼資雖三公在朝協濟經邦之任而一相處內宜存分陝之規屬我元臣誕揚丕號特進尚書左僕射同中書門下平章事兼知樞密院事文安郡開國侯食邑五千五百戶食實封一千八百戶呂頤浩高明而篤實剛毅而恢闊學推齊魯之英氣稟山河之粹達於權而知變更劇易之百為勇于義以奮忠挺險夷之一節慷慨而安神器勤勞而又王家名動華戎勲高廟社自再登于揆路實首執于事樞房杜同功每推權而不吝蘇宋共政蓋相得以甚歡方內治之交修顧外患之孰禦深軫納溝之慮備陳多壘之憂謂翫歲苟安非拯溺救焚之意且待時自定豈興衰撥亂之圖請以身先願為眾倡朕念國步迍邐之滋久邦基艱脆而靡寧警蹕屢遷藩籬莫固徒得君重果為朕行矧黃裳佐唐專決用兵之算而王導輔晉嘗兼都督之稱是用獨委戎旃并提相印董師于於八路仍魁柄于中朝盡長江表裏之封悉歸經略舉宿將王侯之貴咸聽指呼

庶宣暢於威靈用拊寧於方域陪敦邑賦昭示眷懷鼎鉉不移式
係蒼生之望旌旄所向正需元老之猷於戲內惟張仲之賢吉甫
之行何遠上若憲宗之斷裴度之功乃成朕固披勿貳之衷汝亦
有同心之助艱虞攸托中外實均往揚厲於天聲佇恢隆于宰業
維我耆德豈煩訓詞可特授依前尚書左僕射同中書門下平章
事兼知樞密院事都督江淮兩浙荆湖諸軍事加食邑一千戶食
實封四百戶封如故主者施行

起復徽猷閣直學士朝議大夫利州路經略安撫使知興元

府事王庶轉行兩官制

宋高宗

勅由關陝之地通於巴蜀有梁州之區焉德宗迫朱泚之亂蓋由
奉天進狩於梁而戡難之勳自其地始其風聲氣習之尚宜可概
見有能為朕拊循其民申明尺籍以振山西之氣則前人之功斯
無媿矣具官某好謀而能斷任難而有成率邊郡之良家興於義
勇抗數州之賊氣全我陝區朕方期樞臣成闔外之功汝能為國

家建方面之略雖土門之師未集而陝右之勢已張宜錫美官用
作爾社念方圖河內之守莫若寇恂成異時淮蔡之功或歸李愬
茲益隆于任寄宜自奮於功名可

楊時贈四官制

宋高宗

自聖學失傳道無統紀以佛老而亂周孔托六藝以文奸言聰明
才智之人溺於空虛而不知安宅鬼瑣蔽蒙之士安于卑陋而莫
肯遷喬高明中庸析為二致學術既壞興替隨之具官躬稟異材
早親有道德宇和粹望而可知其賢政事修明用之未究所蘊方
立言而垂後將以道而覺民邪說漸排正途斯關朕念談經之益
爰深憲老之懷而天不憖遺邦國殄瘁已詔有司厚賻恤之禮又
給史館取辨正之書茲畀愍章更加榮秩用作興于多士以表著
于斯人

除李顯忠特授威武軍節度使充左金吾衛上將軍食實封
如故制

宋高宗

朕運文武之大柄以濟時操賞罰之至權以御下念秦伯用孟明之義與馮唐面文帝之言眷乃勁臣久于間地肆頒新握靡限舊章隨州觀察使提舉台州崇道觀隴西郡開國公食邑四千一百戶食實封一千二百戶李顯忠挺志堅剛稟姿驍銳生知大義既用夏以變夷洵奏膚公期捐軀而徇國頃者成師以出惟敵是求方志馳于伊吾乃威損于柁邑勉從絀典以塞輿言然而折馘執俘亦云戮力動心忍性抑又累年矧羣材之彙征豈一肯而獨棄粵若國朝之制凡厥將帥之臣或元戎擁節之行或周衛執金之守昔鮮聞于並授今特出于異恩內以增輦轂之嚴外以爲屏翰之重皆將觀政非以假人於戲與人之周庶幾得頗牧而能用共武之服爾其繼英衛之善兵肇敏戎公對敷休命可特授威武軍節度使左金吾衛上將軍食實封如故主者施行

岳飛追復原官改葬錄用其後制

隆興

周必大行

宋孝宗

仁皇在位親明利用之勳神祖御邦首祭狄青之像蓋念舊者不忘於收拭而勸功者當急于褒崇朕祇稟睿謨眷懷宿將茲仰承於素志肆盡洗于丹書具官某拔自偏裨驟當方面知略不專于古法沈雄殆得于天資事上以忠至無嫌于辰告行師有律幾不犯于秋毫外摧孔熾之狂胡內翦方張之劇盜名之難揜眾所共聞會中原方議于橐弓而當路立成於投杼坐急絳侯之繫莫然內史之灰逮更化之云初示褒忠之有漸思其姓氏既仍節制于岳陽念爾子孫又復孤窮于嶺表欲盡還其寵數乃下屬于眇躬是用峻升孤棘之班疊畀齋壇之組近畿禮葬少酬魏闕之心故邑追封更慰轅門之望不徒發幽光於既往庶幾鼓義氣於方來嗟夫聞李牧之爲人殆將撫髀闕西平而未錄敢緩旌賢如其有知可以無憾

趙汝愚罷右丞相制

慶元

鄭促行

宋寧宗

朕寅奉基圖優崇宰輔內爲天子之老賴經體贊元之大猷外爲

諸侯之師倚典戎幹方之大略出入藩輔之用雖異始終眷遇之恩不衰爰敷治朝以詔多士具官某高明而重厚寬博而淵深應變守文兼有大臣之能事善謀能斷獨當天下之危機雅推人望之隆進陟冢司之重蓋烈祖嘗有大用之意姑遺後人惟本朝舊拘左戚之嫌特捐故事頃我家之多難賴碩輔之精忠持危定傾安社稷以爲悅任公竭節利國家無不爲旣隆翊戴之勳尙期啟沃之助虛心無作朕惟藉謀猷告后之忠成功不居汝遽慕明哲保身之義力陳忱悃祈避煩言是用冠書殿之班聯付帥垣之節制眷此七閩之會屢從十乘之行圖所便安昭於體貌於戲命公望以爽輔旣優賜履之崇祖山甫而永懷寧忘補袞之舊益思體國毋有遐心

秦檜降爵易諡制

開禧

周南行

宋寧宗

誅奸雄于旣往罰雖道于生前申勸戒于將來罪難逃于身後蓋人心之積憤豈天網之終疏九變而賞罰可言雖閱時之已久百

世之子孫莫改庶清議之猶存具官某在政和間爲中執法方軍前之抗議其言幾類于程嬰及塞上之還歸此節何如于蘇武惟我高廟過夏少康排眾論而授宰衡如中流之遇維楫謂其間關萬里或能爲國報仇豈期首尾兩端反欲與寇爲地旣潛交于境外卒墮敵之術中兵于五材誰能去之首弛邊疆之備臣無二心天之制也忍忘君父之仇泊奸計之弗行幸國威之再振羣后以師畢會三將之捷日聞黃河以南已聞盡爲晉土鴻溝未割何患不歸太公乃復貪天之功亟爲削地之策密布私黨陰遣誓書造飛謗以翦爪牙忠臣爲之解體還降王而就菹醢行路至今興哀神州自此陸沈戎醜因之坐大一日縱敵遂貽數世之憂百年爲墟誰任諸人之責朕遁追累聖之遺訓褒表上流之故侯憫其灑泣以從戎至于脫幘而就死爲之封菁茅而崇血食庶幾激義概而鼓芳風嗟道濟之見收罪成汝手使武安而尙在戮及其身況士氣久鬱而未張公論追尤而弗置雖保首領以入地下奈何怨

毒之于人深昔晉幸免於賈充禮官請為改諡唐逋誅于林甫天下快其削官其追極品之殊榮更奮異名之美諡以昭夙惡以激懦夫噫鼠以近器而猶忌投豈不念渡江之舊誰與厲階而今為梗其少申悞國之刑蓋獲罪於在天祖宗之靈故假手於今日議論之及尚復漏泉之澤勿忘結草之圖

太師鄂王岳飛改諡忠穆制

程玘行

宋寧宗

昔在高皇中興炎祚如呂丞相勛實著于勒王如岳鄂王烈尤高於衛國蓋禦戎復辟耀為社稷之臣而秉事握樞咸受腹心之寄夫既稽功之無間豈容論德之或殊頃焉異議之莫齊今也師言之允穆同一辭而作諡垂萬世以為公故追復少保武勝定國軍節度使武昌郡開國公贈太師追封鄂王諡武穆岳飛賦河朔之雄姿熟左氏之兵法遁兀木于中宵之急拔劉豫於一鼓之餘西京之地既還河南之境復惟其張馬步將帥俘馘之繫故能定業於江南使其合晉絳澤潞豪傑之謀豈復遺虜於今日雖以忠

而許國屢形于天語之褒嘉奈畏敵而急和深阻於權臣之私意此身卒至於莫保天下道今以為冤朕獲纘不圖敢忘宿憤方將壯薄海之義氣可不伸當日之忠魂爰易嘉稱用彰實美鄙姦夫之遺臭不崇朝而肉寒偉烈士之英風將于秋而髮豎果孰得而孰失抑可勸而可懲今有名孫久司兵饒得非忠義之報足驗天人之符噫遺廟峩峩雖或遊神于古鄂英靈凜凜豈能忘意于中原

參知政事曾從龍除知樞密院事加食邑實封仍兼知參知

政事制

洪咨夔行

宋寧宗

勅聖賢相維而致太平莫重弼諧之奇文武兼資而有知略尤嚴宥密之圖迺瞻譽髦游參大政進筮五兵之重用培九鼎之尊倚成匪輕作命維允具官某學該乎今古識貫乎天人長江大河不足以喻其量之深大山喬岳不足以言其器之重夙擅掄魁之望嘗陪舊輔之聯仲舒見嫉孫宏不少安於朝廷之上李泌出避元

氏寧退處于畎畝之間既屢最于介藩爰趣還于政路屬逢更化
備罄告猶直方大之兼全深得鎮浮之體知仁勇之並用洞明應
變之機顧邊瑣之孔艱期廟謨之宏濟宣帝樞機周密固先二相
之資顯宗紀律設張尤切眾賢之助肆疇庸于間社俾進序于本
兵總提星紐之權仍贊台衡之務邑畚申衍邦典增崇以成道德
之疆以全帝王之勝噫天保治內所以收采薇之功烝民任賢所
以定車攻之業維真儒之無敵知中國之有人務遠乃猷用底于
又可

洪咨夔授試中書舍人制

吳泳行

宋理宗

勅朕式觀人文灼見天運二典三謨之書既遠六誓七誥之旨不
傳漢制詰猶有爾雅之風唐宏詞直類俳優之作皇宋受命五星
聚奎天聖明道其氣渾熙靈元祐其詞達一變西崑儷語之陋養
成南渡諸賢之英今復百年豈無名世具官某性從敏悟學以博
聞剛大直方不改山林之操溫柔深潤能為廊廟之文頃司南臺

晉掌西掖悼大道之久鬱須嘉言之孔彰必為章如雲漢而後足
以見王者之心必出令如風雷而後足以鼓天下之動庶幾治古
復見斯今可

特進左丞相兼樞密使鄭清之特授觀文殿大學士醴泉觀

使兼侍讀制

許應龍行

宋理宗

門下王者承意而從事每懷寅畏之思宰相理物以代天實任燮
調之寄欲潛消于變異當共政以嚴恭胡辭政柄之司屢上囊封
之奏勉從雅志爰錫湛恩具官某心正氣和量宏識遠卓爾負廟
堂之器蕭然如山澤之癯舊學于甘盤已致緝熙光明之益選眾
舉伊尹晉登疑丞輔弼之尊屬當更化之初首任秉鈞之重收召
耆哲拔去凶邪以廉律貪一洗舊汚之染量能授職咸欣公道之
開雖振厲以更新每彌縫而藏用入而陳善為格君心之非出以
告人曰惟我后之德期予于治時乃之休何積潦之甫停至明禋
而復作煜煜震電昭垂警戒之機翼翼小心敢替側修之謹將欲

致和于枹鼓曷嘗移咎于股肱乃薦騰引去之章竟莫遂挽留之意肆陞華于秘殿仍進讀於經幃全其素節之高假以真祠之佚於戲學于古訓尙資良弼之交修克享天心罔俾前賢之專美以永終譽茂對殊休

陳韓除工部尙書依舊沿江制置制袁甫行宋理宗

敕介長江而分閩式嚴留鑰之司掌邦土以命卿增峻中臺之重維時明牧顯有駿功庸就畀于邇聯示益彰于隆委具官某抱承家之學有濟世之才淮楚未寧已見出奇之畫江閩作孽居多靖難之勳寵司陪京往護諸將蠢茲介士擾我朱方倚鐵甕以倡謀棲金峰而假息布元戎之令誓不招攜警羣叛之心期以贖過情辭真切禍福著明且信且疑方自懷於猶豫不留不處遽盡掩于鯨鯢一掃姑息之風亟奏蕩平之捷爰陞常伯晉長繕曹如親九陛之前益煥中權之寵緬惟入覲語及籌邊觀其爲國深謀每以用兵爲戒度德量力朕不忘龜告之言禦侮折衝爾尙奮鷹揚之

志

文天祥特授端明殿學士依舊江西安撫使浙西江東制置使兼知平江府誥王應麟行宋恭帝

勅元戎十乘先行式倚真儒之望師中三命承寵適隆方面之權朕若稽先朝之舊章最重文明之邃職內以待畿廷之彥外亦褒帥閩之賢王素之牧平涼程戡之涖益部皆膺茲選今得其人具官某實學濟時英猷緯國文有武備義概質于神明儒知軍情忠忱貫乎霜日傳檄召兵而志士奮纓冠赴難而國勢張不圖素定之營允謂寡二之略予欲復江表之疆宇命爾攘除予欲壯湖右之翰藩咨爾修扞威稜聳前茅之令醜類膽破竹之危惟才之優者位必崇惟名之重者功必集乃躋班規殿之峻仍帶秩外閩之嚴噫邦咸喜戎有良翰茂對陟明之渥身雖外心在王室趣成敵愾之勛可

文天祥授右丞相兼樞密使都督諸路軍馬制景炎

帝王之立中國惟修政所以攘夷輔相之重朝廷惟用儒所以無敵朕作其卽位圖厥攸功介臣不二心歷險夷而一致咨汝宅百揆賴文武之全才亟歸右揆之班并授元戎之柄肆敷大號專告羣工具官某骨鯁魁落之英股肱忠貞之佐仁不憂勇不懼坎維心之亨國忘家公忘私蹇匪躬之故敵裔虜之猾夏率義旅以勤王慷慨施給鎧之資豪傑雷動感激灑登舟之淚忠赤天知雖成敗利鈍逆觀之未能然險阻艱難備嘗之已熟獨簡慈元之愛爰升次輔之聯方單騎以行驚破夷虜之膽及免胄而入大慰國人之心天地之所扶持鬼神亦爲感泣今職方雖非周邦之舊而關輔未忘漢室之恩伊欲闖輦轂而追三宮復鐘簷而妥九廟非內治節何以實元氣非國威振何以折遐衝披荆棘於靈武之初子未知濟收桑榆于澠池之後事尙可爲思昔元勳有如臣浚在思陵已登於亞相更孝廟乃復於舊班式同今日之中興罔俾前修

宋端宗

之專美況同列崇皋陶之遜而初政俟公巨之來庸再秉於國鈞仍惠長於樞宥優督府珮戈之錫峻文階黃繖之除申拓賦畝式隆寵數於戲春秋以歸季子爲喜朕方徇於私情晉人謂見夷吾何憂爾共扶於興運尙堅忠孝大布公忱迄圖社稷之安茂紀山河之績其祇予命永弼於彝

奉詔移偽齊檄

岳飛

契勘僞齊僭號竊據汴京舊忝臺臣累蒙任使是宜執節效死圖報國恩乃敢背棄君父無天而行以祖宗涵養之澤翻爲怨仇昧臣子忠義之忱甘事沙漠紫色餘分擬亂正統想其面目何以臨人方且妄圖襄漢之行欲窺川蜀之路專犯不韙自速誅夷我國家厄運已消中興在卽天時旣順人意悉諧所在皆賈勇之夫思共快不平之忿今王師已盡壓淮泗東過海沂驛騎交馳羽檄叠至故我得兼收南陽智謀之士提大河忠孝之人仗義以行乘時而動金洋之兵出其西荆湖之師繼其後雖同心一德足以吞彼

國之梟羣然三令五申豈忍殘吾宋之赤子爾應陷沒州縣官吏
兵民等元非本意諒皆脅從屈于賊威歸逃無路我今奉辭伐罪
拯溺蘇枯惟務安集秋毫無犯能開門納款肉袒迎降或願倒
戈以前驅或列壺漿而左道自應悉仍舊貫不改職業盡除戎索
咸用漢條如或執迷不悟甘爲叛人嗾桀犬以吠堯罫獵師而哭
虎議當躬行天罰玉石俱焚禍並宗親辱及父祖挂今日之逆黨
遺千載之惡名順逆二途蚤宜擇處兵戈旣逼雖悔何追謹連黃
榜在前各令知悉

